



Republika e Kosovës
Republika Kosovo / Republic of Kosovo
Kuvendi i Komunës Rahovec
Opština Skupština Rahovac/Municipality of Rahovec



PROCESVERBAL

Nga mbledhja e gjashtë (6) e rregullt e kuvendit komunal të Rahovecit, e mbajtur më **29.06.2022**, me fillim në ora **10:00**. Mbledhjen e kryesoi: Kryesuesi i kuvendit z. **Defrim Kafexhiu**. Konstatohet se kuorum për mbajtjen e mbledhjes kemi:

Kryesuesi – Fillimisht më lejoni të ju përshëndes, i nderuar kryetar i komunës z. **Smajl Latifi**, nënkryetar i komunës z. **Fatmir Iska**, të nderuar kuvendarë, drejtorë të drejtorive komunale, përfaqësues të mediave dhe ju gjithë të pranishëm.

Të nderuar kuvendarë për këtë mbledhje sot, propozojmë këtë:

REND DITE

RAHOVEC / ORAHOVAC	
Njësia Nr./Br./No 01 (Kuvendi i Komunës)	
Nr./Br./No 358	Nr. i faq./Br.str./No.pg 01
Data/Datum/Date 01 / 06 / 2022	

1. Shqyrtimi dhe miratimi i procesverbalit nga mbledhja e kaluar
2. Pyetjet dhe përgjigjet në pyetjet e kuvendarëve;
3. Shqyrtimi dhe miratimi i propozim vendimit për shpalljen me interes të përgjithshëm publik P-00369-0 zonë kadastrale Mrasor;
4. Shqyrtimi dhe miratimi i propozim vendimit për shpalljen me interes të përgjithshëm publik P-00759-0 në zonën kadastrale Retijë;
5. Shqyrtimi dhe miratimi i propozim vendimit për shpalljen me interes të përgjithshëm publik P-00377K-0, 00444K-0 dhe 02214K-0 në zonën kadastrale Xërxë;
6. Shqyrtimi dhe miratimi i propozim vendimit për dhënien në shfrytëzim afatshkurtër të pronës së paluajtshme të komunës, personave fizik dhe juridik – P- 01830-0, zona kadastrale Rahovec;
7. Shqyrtimi dhe miratimi i propozim vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës P - 01830-0, zona kadastrale Rahovec;
8. Shqyrtimi dhe miratimi i propozim vendimit për dhënien në shfrytëzim afatshkurtër të pronave të paluajtshme të komunës, personave fizik dhe juridik – P- 01043-1, 01035-0, 01039-0 dhe 01036-2, zona kadastrale Xërxë;
9. Shqyrtimi dhe miratimi i Propozim vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës P- 01043-1, 01035-0, 01039-0 dhe 01036-2, zona kadastrale Xërxë;
10. Shqyrtimi dhe miratimi i vendimit për Kornizës Afatmesme Buxhetore (KAB) 2023-2025 dhe Qarkores Buxhetore 2023/1;
11. Shqyrtimi dhe miratimi i propozim vendimit për dhënien në shfrytëzim afatshkurtër të pronave të paluajtshme të komunës personave fizik dhe juridik – P-01038-2, 01055-2, 01034-0, 01045-0, 01033-2, 01044-0, 01040-0, 01036-2, zona kadastrale Xërxë;

12. Shqyrtimi dhe miratimi i propozim vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës P-01038-2, 01055-2, 01034-0, 01045-0, 01033-2, 01044-0, 01040-0, 01036-2, zona kadastrale Xërxe;
13. Shqyrtimi dhe miratimi i propozim vendimit për dhënien e pëlqimit për këmbimin e pronës publike komunale me pronën e institucionit qendror për interes publike;
14. Shqyrtimi dhe miratimi i Propozim vendimit për shfuqizimin e vendimit 01-Nr. 306/22 i datës 29.04.2022 për formimin e komisionit për emërtimin dhe riemërtimin e rrugëve, rrugicave, parqeve, shesheve, lagjeve në komunën e Rahovecit i ndryshuar dhe plotësuar me vendimin 01-Nr. 334/22 të datës 31.05.2022;
15. Shqyrtimi dhe miratimi i propozim vendimit për shfuqizimin e vendimit 01 Nr. 333/22 i datës 31.05.2022 për shpalljen me interes të përgjithshëm publik parcelën P-71513005-02756-0 në Zonën kadastrale Krushë e Madhe
16. Informatë nga drejtoria për Bujqësi, Pylltari dhe Zhvillim Rural;

Pikat shtesë

17. Shqyrtimi dhe miratimi i propozim-vendimit për shfuqizimin e vendimit nr.332/22 i datës 31.05.2022 për caktimin e lokacionit për hapësira për biznese;
18. Shqyrtimi dhe miratimi i kërkesës për ndërrimin e akronimit nga SHMLP “Selajdin Mullaabazi-Mici” në IAAP “Selajdin Mullaabazi-Mici” në Rahovec;
19. Shqyrtimi dhe miratimi i propozim vendimit për shfuqizimin e vendimit nr. 329-22 për ndryshimin e vendimit 296-22 për caktimin e lokacionit për ndërtimin e morgut për nevojat e komunitetit të fshatit Hoçë e Vogël;
20. Shqyrtimi dhe miratimi i propozim vendimit për caktimin e lokacionit për ndërtimin e morgut për nevojat e komunitetit të fshatit Hoçë e Vogël;

Kryesuesi – E ftoj sponsorizuesin e atyre dy pikave që duhet të shfuqizohen drejtorin Erhan Morina, për zonën kadastrale Krushë e Madhe, ose fjalën e ka Afrim Oruqi për prezantimin e dy shfuqizimeve.

Afrim Oruqi – Faleminderit kryesues, i nderuar kryetar, nënkryetar, kolegë drejtorë, të nderuar anëtarë të kuvendit, propozoj që të tërheqim pikën me nr. 5 nga rendi i ditës; Shqyrtimi dhe miratimi i propozim vendimit për shpalljen me interes të përgjithshëm publik P-00377K-0, 00444K-0 dhe 02214K-0 në zonën kadastrale Xërxë, me arsyetimin që këto parcela gjinden në zonën e komasacionit dhe sipas planit zhvillimor komunal në fuqi të vitit 2013 këto zona nuk parashihen si zona ndërtimore, për këtë arsye ne kemi brenda kësaj periudhe ne kemi ndryshim të legjislacionit në fuqi që eventualisht këto pika të rikthehen si të kundërligjshme prej MAPL-së, jemi në fazën përfundimtare të përgatitjes së planit zhvillimor të ri komunal dhe këto parcela që po flasim në këto momente janë të parapara në planin e ri zhvillimor komunal në komunën e Rahovecit si zona ndërtimore. Pas kalimit të planit zhvillimor komunal i komunës së Rahovecit ne do t'i rikthejmë këto zona në seancat e radhës, kërkoj nga ju që kjo pikë të hiqet nga rendi i ditës.

Kryetari – Përsërendetje për kryesuesin e kuvendit të komunës, anëtarët e kuvendit, media, drejtorë të drejtorive, nënkryetarin; diçka rreth pikës që ka të bëjë me caktimin e lokacionit për nevojat e ndërtimit të morgut në Hoçë të Vogël, departamenti ligjor i ministrisë së pushtetit lokal ka kërkuar rishqyrtim të vendimit dhe propozoj që ne ta anulojmë vendimit dhe ta nxjerrim një vendim të ri, pra

një pikë të re të rendit të ditës ku 60% që nuk është i paraparë me planin e vjetër zhvillimor komunal, ose është paraparë si tokë bujqësore dhe vendimi i ri të përmbajë vetëm 40% tokë ndërtimore, në fakt aty është ndërtuar morgu. Nuk e di sa jam i qartë, 60% që është tokë bujqësore, ata na kanë kthyer për rishqyrtim, ne e heqim tash 60%-in, e bëjmë një vendim të ri duke e shfuqizuar këtë dhe e vendosim si pikë të re të rendit të ditës, ku më së largu nesër ne ia dërgojmë ministrisë së pushtetit lokal vendimin e ri ku përfshihet vetëm 40% që është tokë ndërtimore. Në qoftëse jeni dakord si pikë e rendit të ditës të përfshihet, propozimi për miratimin e vendimit për caktimin e lokacionit për nevojat e ndërtimit të morgut në Hoçë të Vogël në sipërfaqe sipas PZHK-së që 40% është paraparë si tokë ndërtimore. E ftoj drejtorin e kadastrës që ta bëjë një skicë ku tregon rreth 40% ku është tokë ndërtimore për nevojat e saktësimit të vendimit të ri që pritet të miratohet prej anëtarëve të kuvendit të komunës.

Kryesuesi – Faleminderit kryetar, atëherë shkak për vendosjen e pikave shtesë për seancën e sotme në rend dite është që sipas LVL kuvendi i komunës është i obliguar që të rishqyrtoj vendimet e kthyer nga autoriteti mbikëqyrës për një periudhë 30 ditëshe, kështu që te pika e 20, është shfuqizimi i vendimit nr.329 për caktimin e lokacionit për ndërtimin e morgut dhe po e shtojmë edhe pikën 21, vendimi i ri për caktimin e lokacionit për ndërtimin e morgut për nevojat e komunitetit të fshatit Hoçë e Vogël. Kështu, pikat shtesë po i vendosi në votim, janë gjithsej 5... kush është për?...Atëherë me shumicë votash aprovohet shtimi i 5 pikave tjera në rendi dite. Drejtori i kadastrës si sponsorizues i pikës së 5-të e tërhoqi këtë pikë, rendi i ditës tani gjithsej i ka 20 pika. Atëherë si të tillë e vendosim në votim miratimin e rendit të ditës; kush është për?...kundër?...abstenim?... Me 22 vota për miratohet rendi i ditës për ditën e sotshme, po vazhdojmë me pikën e parë të rendit të ditës;

Burim Krasniqi – Faleminderit kryesues, kryetar, të pranishëm, unë e kam vetëm një kërkesë, është hera e dytë që na vijnë vendimet për shfuqizim, mendoj që është e udhës që vendimet që vijnë për shfuqizim të shoqërohen me materiale mbi bazën e arsyes së kërkuar për shfuqizim. Unë e kuptoj që kryetari ose drejtori ndoshta edhe kryesuesi e kanë informatën, por duhet ta ketë secili asamblistë informatën e plotë për çfarë arsye është kthyer nga MAPL-ja vendimi sepse ne përsëri duhet ta votojmë për shfuqizim dhe për vendim të ri, le të praktikohet që kur një vendim të shfuqizohet të jepet arsyetimi i shfuqizimit të vendimit, asgjë më tepër, besoj që është e drejtë e të gjithë delegatëve të asamblesë ta kenë këtë informatë.

Besë Bytyqi – Faleminderit kryesues, i nderuar kryetar, nënkryetar, kolegë këshilltarë, drejtorë të drejtorive, në emër të grupit të aleancës kërkoj një minutë heshtje në seancë të kuvendit komunal, me rastin e ndarjes nga jeta të poetit tonë Xhevdet Bajraj, një poet i njohur ndërkombëtarisht e meriton këtë lloj respekti.

Kryesuesi - Faleminderit Besë, atëherë ju ftoj të gjithëve të ngitemi në këmbë dhe një shenjë respekti të mbajmë një minutë heshtje... lavdi jetës dhe veprës së poetit Xhevdet Bajraj. Atëherë jemi te pika e parë e rendit të ditës;

1. Shqyrtimi dhe miratimi i procesverbalit nga mbledhja e kaluar; a ka dikush ndonjë koment lidhur me procesverbalin?...Nëse jo, atëherë po e vendosim në votim, kush është për miratimin e procesverbalit?...Me shumicë unanime aprovohet pika e parë e rendit të ditës. Vazhdojmë;

2. Pyetjet dhe përgjigjet në pyetjet e kuvendarëve;

Sinan Kryeziu – Faleminderit kryesues, përshëndetje për të gjithë. Fillimisht jam në dijeni për raportin e auditimit, për pasqyrat financiare vjetore të komunës së Rahovecit të vitit 2021 dhe jam në dijeni që është nxjerrë vlerësimi zyrtar me datën 06.06.2022 dhe është pranuar nga zyra e kryetarit me

datë 09.06.2022. Pyetja ime kish me qenë për kryetarin se kur dëshiron të na prezantoj këtë raport gjeneral të auditimi të jashtëm. Tjetër, e kam një shqetësim unë, në seancën e kaluar, kolegu im Leonard Morina ka kritikuar drejtorinë e arsimit të komunës së Rahovecit, ku në formën e vet është munduar t'i prezantoj disa prova juridike ku ka shkelje të vazhdueshme dhe pas një pauze aty jashtë, për koïcidencë isha afër drejtorit i cili i thotë kolegut Arbër Zenuni; po e citoj; ishte në mënyrë arrogante që mua më pengon shumë "duhet me ma gjetë një mësimdhënës t'a zëvendësoj Leonard Morinën, unë duhet me maru një prej lloqit, me hek Leonard Morinën- me shti atë t'lloqit" kjo qasje është gabim për vlerësimin tim, jo për Leonard Morinën, por për të gjithë këtu në sallë dhe të gjithë banorët e komunës sonë. Unë para vetës kam një aktgjykim, meqë jam jurist flas vetëm me fakte. Aktgjykimi është nxjerrë me datën 05.04.2022 në gjykatën themelore në Gjakovë dega në Rahovec ku e paditur është komuna e Rahovecit, konkretisht DKA-ja. Një mësimdhënës për të cilin e përcakton ligji për ta bërë plotësim-ndryshimin e normës mësimore, e ku ai i gjori anashkalohet sepse nuk ka ndonjë fuqi kështu (se si po shkojnë gjërat këtu te ne) dhe e marrin një tjetër, ndihem shumë mirë që kanë filluar me u marrë me ligjin dhe të jeni në dijeni që DKA-ja nuk është pronë private, por publike dhe interesant është këtu, me këtë aktgjykimin që është nxjerrë me 05.04.2022 thotë; aprovohet kërkesë padia si bazuar, në këtë rast detyrohet DKA-ja dhe shpenzimet procedurale për këto "salltet" që i bënë janë 644euro dhe janë taksa të mia personale dhe është interesant që përfaqësuesi ligjor i DKA-së, po mundohet ta citoj, uroj me qenë gabim teknik, thotë kështu; Përfaqësuesi i autorizuar i të paditurës në këtë rast komunës konkretisht DKA-së, gjatë shqyrtimit kryesore dhe fjalës së tij përfundimtare ka deklaruar se e konteston në tërësi kërkesë padinë e paditësit, në këtë rast të arsimtarit. Këtu mendoj që duhet thënë që e kundërshtoj në tërësi dhe të jipen faktet pse kundërshtohet. Në arsyetimin e tij në përgjigje, përfaqësuesi ligjor thotë; Për shkak se paditësi nuk i ka shterrur të gjitha mjetet ligjore, andaj e konsideron që gjykata tani për tani nuk mund të shqyrtoj një padi që ka elemente "kot fare". Nëse ky përfaqësuesi ligjor që është avokat privat edhe nuk e kundërshton po e konteston. Ta pyes sinqerisht kryetari, "Allahu na ruajt, me na gjet naj sen drejtorin" çka bëjmë ne? sepse ky me një farë mënyre i pazëvendësueshëm!!

Kryetari - Zyra kombëtare e auditimit e ka raportin publik të publikuar, besoj që në korrik si zakonisht çdo vit është fut në rend dite edhe kësaj radhe futet në korrik. Nuk ka nevojë as për "sallta" e as për "filma" sepse është raport publik. Ju siguroj që ballafaqimeve, nevojave për sqarime dhe argumentime jemi këtu për shpjegim dhe nëse dikush dëshiron ta shfrytëzon për tjetër gjë, duhet të jetë në dijeni që ne jemi të zgjedhur të komunës së Rahovecit. Pastaj duhet të kem parasysh që ne nuk jemi këtu në sallë të gjyqimit askush nuk është gjyqtarë e as prokurorë. Ne kemi kapacitete, kemi përfaqësimin ligjorë, kemi avokatin e komunës poashtu kemi një marrëdhënie kontraktuale me avokat që mbrojnë interesat e komunës së Rahovecit dhe besoj që kjo pikë e rendit të ditës nuk është mirë të keqkuptohet, fola pak edhe me kryesuesit me respekt, ne bëjmë pyetje, komente, këshilla, rekomandime, kritika, plotësime por jo të filozofojmë shumë dhe t'ia ndërrojmë dimensionin pikës së rendit të ditës. Nuk ka përgjigje nga DKA sot, përgjigjet në seancën tjetër, ndërsa për raportin e ZKA-së përgjigjen e keni të qartë, në korrik futet në rend dite, jemi të obliguar.

Sinan Kryeziu – Unë duhet me qenë korrekt, me veten dhe juve e sidomos me kryetarin, nuk i thash kryetarit me bë "sallta" përkundrazi i thash zyrës së DKA-së, këtu ka keqpërdorim të detyrës zyrtare që sanksionohet me ligj. Nuk pajtohem unë për qejfe të dikujt, që taksat e mia vetëm procedurë gjyqësore t'i paguajmë 644 euro, për një lëshim të drejtorisë, nuk thash për raportin e auditorit, por për drejtori kjo është shumë serioze.

Kryetari – Tash prej këtu po sqaroj, nuk po replikoj. Nuk thash që unë po bëjë “sallta” po bën til...Dëgjo, nuk je ti organ që gjykon, ose vendos për drejtorinë. Kemi instancat gjyqësore që vendosin për cilindo, ka një vendim të shkallës së parë, ka të drejtë për ankimim, ndërsa kush është organi që merret me trajtimin e çështjeve që ti i paraqet, unë që ti je jurist edhe i din. Nëse ti mendon që duhet të sakrifikoj diçka, nuk ta jap atë kënaqësi as ty as askujt, sepse ky është drejtor i drejtorisë së arsimit i emëruar prej kryetarit dhe përfaqëson konceptin dhe vizionin e kryetarit të komunës dhe punën e tij e bazon në ligje dhe udhëzime administrative, në çoftëse ky ka bërë shkelje, nuk jam unë si asambleist që mund të vendosi për të. A ka bërë mirë, apo keq ti mund të thuash çkado që dëshiron, mirëpo vlerësimet përfundimtare e merr dikush tjetër.

Bejtullah Deliu – Faleminderit i nderuar kryesues, kryetar, zv. kryetar, drejtorë të drejtorive, kolegë asambleistë, media dhe ju të pranishëm. Rastësisht nëpër rrjete sociale dhe e pashë në postim nga ministria e bujqësisë që gjatë muajit prill dhe maj kanë aplikuar 15 komuna për një grant për ujitje, nga këto 15 komuna 8 prej tyre janë përfituese. Komuna e Rahovecit shquhet apo krenohemi që jemi kryeqytet i bujqësisë e këtu nuk jemi përfitues dhe kjo më shqetëson nga fakti ku jep sqarim ministria thotë; vlen të theksohet se pas shkresës e cila i është drejtuar të gjitha komunave dhe drejtorive respektive për bujqësi të vendit në fund të muajit prill dhe fillim të muajit maj në adresë të bujqësisë kanë ardhur 15 projekte për sistemin e ujitjes nga këto janë 8 përfituese, dëshiroj një sqarim nga drejtori i bujqësisë apo edhe nga ju kryetar, nëse ne kemi dështuar në këtë projekt duhet të jep dikush përgjigjësi, por nëse ministria për shkaqe personale apo që më herët është kritikuar që ministri nuk vjen për vizitë te ne e shkon direkt në terren, mendoj që pozitë e opozitë duhet të reagojmë këtu dhe nga ministria të kërkojmë që komunën tonë ta përfshij sidomos në këto projekte, nuk dua të fajësoj as drejtorinë për moment pa i dëgjuar faktet, por nëse ne si komunë kemi dështuar për një projekt të tillë, atëherë është çështje serioze dhe të jepet përgjigjësi nga dikush, nëse prapë e citoj për shkaqe banale ministria e ka eliminuar Rahovecin për këtë projekt, ju ftoj pozitë e opozitë për reagim, me konferencë për media dhe me të gjitha mundësitë për presion sepse për këto projekte Rahovecit duhet të jetë komuna e parë përfituese. Në arsyetim të dytë, rreth akuzës së kolegut nëse me të vërtetë ajo bisedë mes drejtorit dhe asamblistit ka ndodhë, është vërtetë pak shqetësuese. Nëse kryetari e arsyeton drejtorin që ky drejtor është i zgjedhur dhe i ndjek politikën e kryetarit, uroj që politikën e kryetarit mos t'i ketë.

Kryetari – Bejtullah, ne nuk kemi aplikuar për zgjerim të sistemit të ujitjes për shkak që nuk kemi të drejtë, sepse KRU-Gjakova është aplikuese dhe është e përfshirë në një projekt të bankës botërore, rehabilitimi i sistemit aktual të ujitjes dhe zgjerimi i këtij sistemi, pra aplikacionet në këtë rast shkojnë përmes KRU-Gjakovës dhe ne si komunë deri në fund të 2022 nuk kemi të drejtë aplikimi në projekte të tilla, ndërsa në projekte të cilat ministria e bujqësisë ka bërë thirrjen, kanë të bëjnë me burime alternative dhe kanale të hapura të cilat ne nuk kemi mundësi t'i zhvillojmë për shkak të këtij projekti të madh të bankës botërore, rehabilitim dhe zgjerim kjo është arsyeja dhe arsye tjetër nuk ka sepse nuk kemi të drejtë aplikimi deri në 2023. Sa i përket çështjeve që kanë të bëjnë me relacionet e komunës së Rahovecit me ministrinë e bujqësisë, në asnjëherë nuk e kemi kontestuar faktin që prodhon nevojën për relacione e bashkëpunim midis nivelit lokal dhe qendror të drejtorisë sonë të bujqësisë dhe ministrisë në anën tjetër dhe kjo është duke ndodhur, faktikisht jemi komunal që ka 2976 aplikues për subvencione dhe ne shqetësimet të cilat i kemi ngritur p.sh; kësaj radhe i kemi ngritur për çështje të noterit, ka mund të tingëllojë jo mirë për ata të ministrisë, por besoj që së shpejti do ta vizitoj edhe komunën e Rahovecit dhe do të diskutojmë tema që janë në nevojë për komunën e

Rahovecit për grante, subvencionim të verëtarëve, vreshtarëve – i kemi ngritur këto tema edhe me kryeministrin që ishim në Prevallë, me ministrin e Financave dhe besoj që nuk ka arsye askush të bëhet nervoz e as ministri i bujqësisë në këtë rast sepse është e vërtetë që mundet me qenë më fleksibil për shkak se komuna jonë e ka vulën e një treve bujqësore në krahasim me komunat që janë më pak bujqësore, sidoqoftë ai po vepron mirë që po shkon nëpër komuna tjera edhe në komunën tonë shpresoj që shpejt do ta kemi dhe do ta kemi një situatë të qartë eventualisht ndonjë keqkuptim që e ka pas, unë nuk kam keqkuptime, kam ngritur interesa dhe shqetësime të qytetarëve dhe do t'i ngrisë prapë, nga kjo foltore edhe në emër të juajin e kam ngritur çështjen e mungesës së noterit sepse jemi ndër 15 komunat që nuk kemi ende noter edhe në takimin në Prevallë që ishim me kryeministrin edhe me ministrin e drejtësisë që duhet të bëjmë në zgjidhje sa më të shpejtë që noterët e Prizrenit t'i vendosin selitë e veta këtu, secili qytetarë ka nevojë për noter, jo vetëm fermeri. Besoj që ministri i bujqësisë z.Faton Peci shumë shpejt do të jetë në Rahovec, për shumë çështje që ka nevojë treva jonë dhe e ka prioritet bujqësinë, për më shumë të sheh nga afër se çka e mundon bujkun tonë dhe cilat janë sfidat e produkteve tona që i kemi sot të gatshme etj etj. Ne e kemi një projekt përveç depos për magazinim e kemi edhe një projekt të madh, në çoftëse na ndihmon do t'ia prezantojmë sepse jemi të përgatitur në fushë të fakteve dhe argumenteve për nevojat dhe kërkesat e qytetarëve dhe bujqve të komunës së Rahovecit. Nuk marr përsipër çka ka thënë drejtori, as drejtori as kryetari i komunës dhe asnjëri nga ju nuk përfaqëson konceptin e një klime të acaruar me elemente fyese dhe nuk marr përsipër çka bisedohet nëpër korridore, njerëz jemi edhe mund të themi diçka edhe në afekt.

Burim Krasniqi – Faleminderit kryesues, po reduktohem pak prej përshëndetjeve mos të marr shumë kohë. Prej drejtorisë së urbanizmit tash në seancë mora përgjigjen rreth pyetjes se a duhet të kenë pranim teknik, d.m.th që po, çdo objekt pas përfundimit duhet të ketë pranim teknik nga investitori. Shpresoj drejtor që tani e tutje do të aplikohet kjo, me një komision profesional të ta bëni pranimin teknik të objekteve që investon komuna pavarësisht të kaluarës, sepse kryetari në seancën e kaluar tha që me raportin përfundimtar për herën e fundit e kemi bërë si pranim teknik. E dyta, një shqetësim që e kam, kryetar dhe drejtoreshë e inspekcionit, sipas një konkursi që është shpallur për inspektor ndërtimi, fillimisht si konkurs të brendshëm por që nuk ka pasur aplikantë pastaj si konkurs të jashtëm, keni pranuar një inspektor të ndërtimit, sa e di unë inspektori në fjalë nuk e ka kualifikimin e inxhinierit të ndërtimit, përveç që në konkursit e dytë të jashtëm thuhet; specialist i inxhinierisë së ndërtimit-pozicioni inspektor ndërtimi. Është edhe një konkurs tjetër diku në komunë që prapë është kërkuar specialist i inxhinierisë së ndërtimit, nuk dua t'i përmendi emrat sepse është çështje konfidenciale e atyre përfituesve të konkursit, sa e di unë asnjëherë prej tyre nuk është inxhinier i ndërtimtarisë, si e tillë nuk besoj që guxohet të veprohet kështu, që kur kërkohet specialist i ndërtimit e të punësohet me profesion tjetër, sikur të ishte konkursi; kërkohet inspektor ndërtimi me këto kualifikime, inxhinier ndërtimi, jurist, ekonomist etj etj... blla blla blla 15/16 profesione qysh e dimë ndonjëherë për ta rregulluar konkursin, e kuptoj... po kur kërkohet specialist ndërtimi duhet me qenë patjetër inxhinier i ndërtimtarisë, nuk diskutohet ndryshe. Drejtoreshë, a mundet inspektori i ndërtimit i pakualifikuar si inxhinier të jetë i gatshëm të zbatoj ligjin për ndërtim 04/110 gjegjësisht nenin 31 kur thotë; secila fazë e ndërtimit është pjesë përbërëse e kërkesës të lëndëve ndërtimore dhe inspektimi realizohet pas përfundimit të secilës prej këtyre fazave në kuadër të zbatimit të kërkesave për lejen e ndërtimit. Paragrafi 2, inspektori verifikon përpunjen e punëve përfundimtare me dokumentacion ndërtimor dhe do të prodhohet protokoll mbi përfundimin e fazës respektive të ndërtimi i cili nënshkruhet nga përdoruesi i lejes, kontraktuesi dhe inspektori. Nuk po citoj nene tjera të këtij

ligji, si i tillë njëri prej inspektorëve që ka qenë prej fillimit e ka të kryer kriminalistikën pra nuk është inxhinier i ndërtimit por është inspektor që ka filluar punën prej vitit 2003 nëse nuk jam gabim që mund të vazhdoj punën e vet, por tash duhet të plotësohet ky inspektor me një profesionist tjetër. Besoj që duhet të keni kujdes dhe të rishikoni këtë konkurs edhe një herë, nuk po i kontestoj emrat, personale nuk e kam me askënd, por besoj që duhet të jemi të kujdesshëm. Meqenëse Përparimin nuk po e shoh këtu, te raporti i auditorit, një prej të gjeturave thotë që ka procedurë një burimore tenderuese, që është raport i kualifikuar për të cilën është pajtuar edhe menaxhmenti. Në anën tjetër në tenderin e fundit në e-prokurim ndërtimi i rrugëve lokale në komunën e Rahovecit Lot-3 thotë; procedurë e negociuar pa publikim të njoftimit të kontratës, së paku që kur të vie një raport i auditimit, të gjeturat duhet të jemi më shumë të kujdesshëm që mos të përsëriten njësoj, po rekomandoj dhe besoj që keni me qenë më të kujdesshëm se një prej të gjeturave të prokurimit thotë që procedurat e negociuara si e gjetur jo e rregullt dhe menaxhmenti thotë po pajtohem. Pres që drejtori i urbanizmit të veproj sipas ligjit në të ardhmen dhe këto dy konkurse të rishikohen pa pas parasysh se kush janë ata dhe ky tender të jetë i hapur e jo i negociuar.

Kryetari – Po Burim, është e vërtetë që unë kam thënë që situacioni përfundimtar i shoqëruar me një raport nga menaxheri është fakti ose argumenti që e konsideron të përfunduar një projekt të caktuar. Ne kemi raste kur kemi pranime teknike, bie fjala për buste-shtatore, shkolla “Sadedin Hajda”, apo çerdhja e fëmijëve ka një standard që veprohet edhe kështu edhe ashtu, por ne kemi një rekomandim nga zyra lidhore dhe nga ekipi i USAID që ka punuar me ne, që në raportin përfundimtar të terrenit të projektit na jep mundësinë që ky projekt të jetë më i monitorueshëm, më i qëndrueshëm dhe është sepse organet që e kanë përcjellë projektin janë më të sigurtë në vendimmarrje dhe më shumë mund të sigurojnë ata sesa një komision i cili nuk e ka përcjellë asnjë element të projektit dhe tash vjen veç e bënë një matje. Pra, ne këtë rekomandim e kemi zbatuar të USAID TIME dhe në vlerësime kemi dal shumë mirë, por kemi ende situata kur duhet edhe raport të komisionit të pranimi teknik. Pra komisioni i pranimi nuk është i dëmshëm, por më e qëndrueshme është kjo me situacion përfundimtar, Prishtina e aplikon këtë, ka komuna tjera që shkojnë me komisione të pranimi etj...Ne nuk mundemi mos me pas komision të pranimi teknik p.sh; për bustin e Skender Kastratit ose Murat Rexhepit ose për një shtatore tjetër. Por nuk mund të kemi komision të pranimi teknik p.sh. ia nisim një objekti ose shkolle pa e përcëlluar asnjë element gjatë ndërtimit, për përfundim të punës t’i dërgojmë disa inxhinier (shkoni tash për najë vërejtje sipërfaqësore)... Prandaj me USAID-in kemi diskutuar gjatë dhe na kanë rekomanduar kështu dhe ligjërisht është në rregull. Pra drejtori nuk ka bërë keq që t’a ka dhënë këtë përgjigje, por përgjigja më e plotë është kjo që po ta jap unë.

Lirigzon Kastrati – Faleminderit kryesues, ekzekutiv, kolegë asamblistë. I kam dy pyetje për ekzekutivin. Rreth çështjes së rregullimit të rrugëve fushore në fshatin Hoçë e Vogël. E di që komuna nuk ka mundësi që t’i shtrojë të gjitha rrugët me asfalt, mirëpo së paku pengesat t’i largojë. Nuk e di a ka ndonjë plan rreth kësaj sezone për pastrimin e këtyre rrugëve fushore nga pengesat që këto rrugë i bëjnë të pakalueshme. Çështja tjetër është; një vendim të datës 14.07.2020 nga drejtoria e shërbimeve publike, kjo drejtori ka marrë një vendim nga drejtori Përparim Krasniqi me të cilin aprovohet kërkesa e z. Mustaf Elshani nga Brestoci 28.05.2020 në arsyetim thuhet; Drejtoria për shërbime publike duke shqyrtuar kërkesën e paraqitur dhe shkresat e lëndës, pas daljes në terren dhe pas hartimit të procesverbalit të datës 29.06.2020 si dhe pas analizës së mundësive financiare të drejtorisë, ju njoftojmë se në kuadër të projekteve infrastrukturore për ndërtimin e kanalizimeve në komunën e Rahovecit për 2020-2021 është planifikuar që të bëhet rregullimi i kanalizimit fekal në

lagjen tuaj, prandaj kjo drejtori ka vendosur si në dispozitiv. D.m.th. vendimi është marr, kurse rregullimi i këtij kanalizimi prej 60m nuk është kryer. Drejtor, a i din pasojat juridike të këtij vendimi?... (e di që nuk është i pranishëm, por besoj që do të marr përgjigje) dhe ku ka shkuar ky projekt, pse nuk ka përfunduar? Ky projekt është dashur të përfundoj 2020-2021.

Kryetari – Pasojat juridike i bartë drejtori dhe do të përgjigjet sigurisht penalisht për këtë temë (nuk po bëjë shaka). Ne kemi kontrata të cilat vazhdojnë së zbatuari që nuk janë zbatuar ende dhe nuk është e quditshme që një kërkesë aprovohet dhe llogaritet që ajo punë të kryhet, po nuk ka mund të kryhet, një kanalizim është kryer atje, i kemi shfrytëzuar disa mundësi në Brestoc bie fjala, e kësi vendime kemi shumë...

Vlora Vuqiterna – Faleminderit kryesues, përshëndetje për të gjithë. Unë dua të lidhem pak tek raporti që na është sjellë nga drejtoria e shëndetësisë. Në fillim të këtij viti është vë në funksion mamografi- aparati për diagnostikimin e kancerit të gjirit, që për fat të keq prek shumicën e femrave. Padyshim që është për t'u përgëzuar drejtoresha e shëndetësisë për këtë hap të duhur, mirëpo sa janë të informuara gratë e komunës tonë që ky aparat është në funksion dhe që ato mund t'i kryejnë ekzaminimet e duhura sa jam në dijeni unë vetëm në fillim, kur është vërë në funksion ky aparat është bërë lajmi dhe përgjatë këtyre 3-4 muajve më nuk ka pasur ndonjë ri 'postim apo ri informim. Tjetër, komuna jonë duhet të ndërmerri iniciativa dhe organizime më të shpeshta rreth kësaj sëmundje, e jo të dalim vetëm simbolikisht një herë në vit gjatë muajit të ndërgjegjësimit të kancerit të gjirit. Besoj shumë që iniciativat e tilla janë shumë të nevojshme për komunën tonë.

Sejfullah Sejfullahu – Përshëndetje për të gjithë, kryetar, nënkryetar, kryesues, drejtor, kolegë asamblistë, t'a bëjë edhe unë një pyetje, po bëhem pak lokalist këndeje ka kultura, se ka Berati nuk ma don fort punën!...Kryetar, pak presion është mirë m'i bë operatorit për shtëpinë e kulturës, le ti jep zor pak, se tash i kemi edhe ushtrimet, qe 2-3 herë po e ngrisë këtë çështje, bash me dashtë me marr betonin prej meje operatori, tash nuk e merr! Prej këtyre të urbanizmit se kush e ka bë projektin edhe pse privatisht të kisha pyetur kur të ishim takuar, projektin që janë duke e rregulluar në shesh, a ka mundësi një vend, po kanë qejf një shqiponjë një farë muri, ide shumë e mirë me pa në vizatim, për moment nuk e kam të gatshme, por kushdo që e ka bë projektin kam qejf me ja shtu edhe qatë se nuk bëhet kiameti!

Kryetari – Vlora ka të drejtë plotësisht, megjithëse ka plotë vizita që bëhen më në konfidencë dhe pajtohem plotësisht që duhet të ketë një fushatë informuese dhe sensibilizuese. Është një grup joformal i grave që duhet ndoshta edhe nga kuvendi me qenë më aktive dhe jam dakord në atë që the. Ne kemi nevojë ndoshta edhe të krijojmë edhe kushte më të mira, që ndoshta atë ta ndiejnë veten më të sigurt në përgjigjet ose shërbimet që i'u ofron mamografi. Po të bëjë thirrje, bashkë me grupin joformal të grave dhe filloni në këtë temë dhe mos t'a lëmë vetëm në tetor (muaji në ndërgjegjësimin e kancerit). Sëfa e ka ngritë një çështje, ju e keni pa që këto kemi filluar mezi t'i bindim operatorët që duhet të punojnë sepse kanë telashe dhe ne jemi midis dy zjarreve që thotë populli, në njërin anë kemi të drejtë t'i ftojme operatorët për zbatim të kontratave sepse kemi marrëdhënie të firmosur dhe vulosur, duke e ditur që çmimet janë rritur shumë. Këto ditë kemi pas shumë sukses në rikthimin e operatorëve në punishte, "betejë" vazhdon...Por, ne nuk kemi arrit t'a bindim ende operatorin për ndërtimin të aneksit për nevojat e ansamblit "Bajram Curri" në Krushë të Madhe, i cili mund të korrigjohet jam shumë dakord. Ndërsa te sheshi, po sheshi tashmë është i hapur, janë ndërmarrë veprimet e nevojshme, janë zbatuar të gjitha procedurat ligjore dhe kemi arritur që pa i prish marrëdhëniet me askënd të zbatojmë ligjin dhe të krijojmë hapësira operatorit për t'a kryer punën e

vet. Në çoftëse ka kësi lloj kërkesash mund t'a akomodojmë ndonjë shqiponjë apo një simbol që jep një imazh për Krushe, jam dakord, mund të merremi vesh me operatorin, menaxher i asaj kontrate mesa e di unë është Albnor Mullabazi, mundemi t'a bëjmë një zgjidhje. Vonesat në zbatimin e kontratave vijnë si rrjedhojë e mungesës financave nga komuna, ndonjëherë edhe mungesa e seriozitetit të operatorit por kësaj radhe jemi ballafaquar me rritjen e çmimeve sepse ka pas një konsensus në pritje të një vendimi potencial të qeverisë për subvencionimin e humbjeve të supozuara në ato kontrata që janë lidhur para rritjes së çmimeve, operatorët po e shohim që nuk kemi ende vendim të qeverisë, nuk kemi qëndrim konkret se a do të ndodh ose jo, shtetet e rajonit ju kam treguar që e kanë bërë, por ne nuk kemi kohë të presim, aty ku kemi pak para e pak mundësi ne jemi duke iu bërë presion sistematik operatorëve të kthehen në punishte. Sivjet sfida e kemi rrugën katër krosi, i kemi ndoshta 1.000.000€ dhe ende nuk ia kanë nisë të punojnë, arsyetimi është që asfalti (betoni) është shumë shtrenjtë. Mos t'i mbesë borxh Sinanit, e përmendi raportin e ZKA-së. Është e vërtetë që në opinion kanë ndikuar edhe subvencionimi i tri OJQ-ve përfituese që nuk kemi qenë në dijeni në atë kohë, vërtetimin e ATK-së e kanë dhënë të falsifikuar dhe janë OJQ që bukur kanë suksese, janë OJQ sportive. As komisioni nuk ka qenë në dijeni për këtë gjë, se ata kur nuk kishin marrë subvencione pa vërtetim valid. Në një pamundësi të komisionit për verifikim ka bërë që auditori të ketë këtë gjetje.

Merisa Sharku – Përhëndetje për të gjithë, e përgëzoj kryetarin për gjetjen e burimit të ujit afër shtëpisë, në këtë rast desha të ndërlidhem me ankesën e banorëve të fshatit Senoc të cilët kanë problem me burime të ujit. Këtu e dimë që përgjegjësinë e ka Radoniqi, por desha të bëjë një kërkesë për kryetarin që të interesohet pak më shumë të bëjë trysni ose bashkëpunim me Radoniqit që të vijnë deri te një gjetje e një burimi të ujit edhe për këta banorë që të mos mbesin pa ujë sidomos këto muaj të verës që edhe kemi ardhje të mërgimtarëve. Te shtëpia e pleqve shpimi ka shkuar deri në 185m e për siguri më të madhe deri në 200m. Radoniqi në Senoc ka provuar deri në 130m. Kërkesa jonë është që kryetari ta rrisë bashkëpunimin me Radoniqit dhe të gjejë zgjidhje për banorët e fshatit Senoc.

Kryetari – Faleminderit Merisa, e keni ngritur një çështje jashtëzakonisht të rëndësishme. Po, 130m dhe ndoshta pak më shumë kemi shkuar me shpim për kërkimin e gjetjes së burimit dhe nuk ka. Fatkeqësisht Senoci konsiderohet që ka varfëri në burime ujore. Është një projekt me Radoniqin që e ka bërë gati KRU Gjakova të cilit po i drejtohem nga kjo seancë në prani të mediave. Bashkëpunimin e kemi të mirë me KRU-në, ne paguajmë 49% në zbatimin e marrëveshjeve ata paguajnë 51%. Në momentin që fillon punën KRU ne jemi të gatshëm ti përgjigjemi, a do të filloj apo jo! Fondel KRU-Gjakova i merr nga ministria zhvillimit ekonomik, nëse ata i kanë të garantuara këto mjete, atëherë ne i japim garancinë për garantimin e mjeteve të cilat ne marrim pjesë. Shpresoj që ata do të bëhen gati, ne jemi gati.

Kryesuesi - Faleminderit kryetar, dikush tjetër ndonjë çështje?... Nëse jo atëherë po vazhdoj me pikën e tretë të rendit të ditës.

3. Shqyrtimi dhe miratimi i propozim vendimit për shpalljen me interes të përgjithshëm publik P-00369-0 zonë kadastrale Mrasor;

Afrim Oruqi – Faleminderit kryesues, të nderuar anëtarë të kuvendit, sipas ligjeve në fuqi para jush keni vendimin për shpalljen me interes të përgjithshëm publik pjesën e parcelës 369-0 në zonën kadastrale në Mrasor. Pra, bëhet fjalë për 2 ari e 40m katror të mirët prej pjesës së përgjithshme të parcelës e cila është në të Sokol Rexhepi nga fshati Mrasor. Qëllimi i shpalljes i parcelës në interes publik është që të merremtojmë një shtab të Ushtrisë Çlirimtare të Kosovës dhe pas kësaj do to

vazhdojmë me procedura tjera mbi faljen e kësaj pjese dhe t'a regjistrojmë në emër të pronës së komunës, ftoj anëtarët e kuvendit që të votojnë këtë vendim.

Kryesuesi – Faleminderit drejtor, dikush ndonjë gjë rreth kësaj pike?... Nëse jo atëherë po e vendosim në votim! Kush është për miratimin e kësaj pike?...Me shumicë unanime miratohet pika e tretë e rendit të ditës, vazhdojmë me pikën e katërt;

4. Shqyrtimi dhe miratimi i propozim vendimit për shpalljen me interes të përgjithshëm publik P-00759-0 në zonën kadastrale Retijë;

Afrim Oruqi – Faleminderit kryesues, të nderuar anëtarë të kuvendit, sipas legjislacionit në fuqi para jush keni vendimin për shpalljen në interes të përgjithshëm publik pjesën e parcelës 00759-0 në zonë kadastrale në Retijë, bëhet fjalë për parcelën që është në emër të Ilia Cvetka Nikolic me sipërfaqe 20 ari e 58m katror, ne po e shpallim me interes të përgjithshëm pjesën e parcelës prej 5 ari në këtë zonë. Atje pas luftës së fundit janë varrosur dëshmorë, martirë dhe civilë, ne e kemi meremetuar dhe jemi në proces të këmbimit ose shpronësimit në faza tjera të kësaj parcele pasi që fatkeqësisht na figuron në emër të një pronari privat, ftoj anëtarët që t'a votojnë vendimin për shpalljen me interes të përgjithshëm.

Kryesuesi – Faleminderit drejtor, nëse ka dikush diçka rreth kësaj pike të rendit të ditës?... Nëse jo, atëherë po e vendosim në votim, kush është për miratim? ... Me shumicë unanime miratohet edhe pika e katërt e rendit të ditës, vazhdojmë me pikën e pestë;

5. Shqyrtimi dhe miratimi i propozim vendimit për dhënien në shfrytëzim afatshkurtër të pronës së paluajtshme të komunës, personave fizik dhe juridik – P- 01830-0, zona kadastrale Rahovec;

Erhan Morina – Faleminderit kryesues, të nderuar anëtarë të kuvendit, media e ju të pranishëm. Para jush keni propozimin për dhënien e pronës së paluajtshme të komunës në shfrytëzim për personat fizik dhe juridik si dhe zhvillimin e procedurave të ankandit publik. Prona e paluajtshme gjendet në zonën kadastrale në Rahovec, në vendin e quajtur “Ispod sello” konkretisht te parku “Toni dhe Mici” me nr. të pronësisë 01830-0 me sipërfaqe 5813m katror dhe se ne pretendojmë të japim në shfrytëzim vetëm një pjesë të saj me sipërfaqe prej 232m katror në periudhë afatshkurtër deri në 3 vite. Këto prona mund t'i shihni edhe në projektor, kjo pronë ka qenë e dhënë në shfrytëzim dhe i mbaron kontrata në gusht të këtij viti dhe se drejtorja për ekonomi zhvillim dhe turizëm planifikon t'a jap përmes ankandit publik. Ftoj anëtarët e kuvendit që të votojnë për këtë pikë të rendit të ditës.

Kryesuesi – Nëse dikush ka diçka rreth kësaj pike?... Nëse jo, atëherë po e vendosim në votim pikën e pestë të rendit të ditës, kush është për miratim?...Me shumicë unanime miratohet edhe pika e pestë e rendit të ditës, vazhdojmë me pikën e gjashtë;

6. Shqyrtimi dhe miratimi i Propozim vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës P - 01830-0, zona kadastrale Rahovec;

Erhan Morina – Faleminderit kryesues, para jush keni propozimin për formimin e komisionit për zbatimin e procedurave dhe vlerësimin e ofertave të dhënies në shfrytëzim afatshkurtër deri në 15 vite për prona të paluajtshme të komunës me nr. të pronësisë 01830-0. Ky komision përbëhet përbëhet prej 5 anëtarëve; 2 përfaqësues të kuvendit, 2 nga ekzekutivi dhe një nga sektori joqeveritarë, andaj ftoj anëtarët e kuvendit që t'a votojnë këtë pikë të rendit të ditës për formimin e komisionit.

Kryesuesi – Faleminderit drejtor, atëherë siç e tha edhe drejtori, komisioni është i përbërë prej pesë anëtarëve, ku 4 prej anëtarëve janë nga kuvendi i komunës, ku çdo grup i asamblastëve mund të vendosë nga një anëtarë.

Erhan Morina – Kërkoj ndjesë, këtu zyra e kuvendit ka bërë një lëshim teknik sa i përket përpilimit të këtij vendimi, juve iu ka ardhur një vendim tjetër, nëse dëshiron edhe zyra ligjore mund t'a prezantoj se si duhet...

Kryesuesi – E ftoj zyrtarin ligjor për prezantim meqë është bërë ky lëshim nga sekretaria e kuvendit.

Mirsad Shala – Faleminderit kryesues, nënkryetar, drejtorë të drejtorive, asamblastë. Zyra ligjore ka hartuar vendimin për formim të komisionit për zbatimin e procedurave për vlerësimin e ofertave të dhënies në shfrytëzim të pronës së paluajtshme të komunës. Në pjesën hyrëse të këtij vendimi neni 17 i ligjit për dhënien në shfrytëzim të pronës së paluajtshme të komunës dhe paragrafi 1 dhe 2 i rregullores 09/2020 për përcaktimin e procedurave të dhënies në shfrytëzim dhe këmbim të pronës së paluajtshme të komunës ceket kështu; Neni 17 paragrafi 1 thotë; për zbatimin e procedurave të dhënies në shfrytëzim të pronës së paluajtshme të komunës formohet komisioni vlerësues në përbërje të 5 anëtarëve. Paragrafi 2 parasheh; kryetari i komunës propozon 2 anëtarë nga ekzekutivi, kuvendi i komunës propozon 2 anëtarë nga kuvendi i komunës dhe nga sektori joqeveritarë një anëtar, besoj që ka qenë një lëshim i sekretarisë së kuvendit që i ka cekur në bazë të partive politike gjë që nuk bënë kjo.

Kryesuesi – Faleminderit Mirsad, atëherë meqenëse prej anëtarëve të kuvendit vetëm 2 anëtarë e përbëjnë komisionin e 5 anëtarëve, po i kërkoj propozimet prej grupeve të asamblastëve, a i kemi më shumë se 2 propozime? Grupi i Aleancës? I Vetëvendosjes? I Lidhjes Demokratike? PDK?

Burim Krasniqi – Faleminderit shumë, meqenëse kemi të bëjmë me 3 komisione të partive të ndryshme e që janë të njëjtës natyrë, e njëjta përbërje, është mirë që këto komisione t'i bëjmë mbas pauzës duke gjetur një konsensus brenda grupit të asamblastëve komplet dhe të shkojmë tutje...

Kryesuesi – Meqë është edhe koha e pauzës, vazhdojmë me pauzë deri në ora 1, më pas vazhdojmë seancën...

Kryesuesi – I nderuar kryetar, të nderuar anëtarë të kuvendit komunal, nënkryetar, drejtorë të drejtorive po e vazhdojmë pjesën e dytë të seancës pauzës kemi mbete te pika 6, formimi i komisionit për vlerësimin e ofertave të dhënies në shfrytëzim të pronës së paluajtshme të komunës, 2 anëtarë prej kuvendit komunal delegohen në këtë komision, i ftoj grupet e asamblastëve për propozime, Aleanca?

Besë Bytyqi - Faleminderit kryesues, për këtë komision, grupi i Aleancës propozon Feriz Thaqin.

Leonard Morina – Grupi i lëvizjes Vetëvendosje propozon Sinan Kryeziun.

Sejfullah Sejfullahu – PDK propozon, zonjën Melinda Iska- Oruqi.

Kryesuesi – Meqenëse i kemi 3 propozime, është i pashmangshëm votimi për secilin kandidatë, kisha propozuar që njëri prej grupeve të tërhiqet për këtë komision dhe t'ia bëjnë radhën për komisionin e radhës, nëse mundemi me arrite një koordinim të tillë!...Faleminderit për korrektësinë, atëherë 2 kandidatë janë Feriz Thaqi dhe Sinan Kryeziu si kandidatë që janë për t'u deleguar në komisionin për vlerësimin e ofertave të dhënies në shfrytëzim të pronës së paluajtshme të komunës. Dy përfaqësues nga ekzekutivi edhe një prej sektorit joqeveritarë do të vendosen më pastaj. Kush është për formimin e këtij komisioni në këtë format?... Me shumicë votash aprovohet pika e gjashtë e rendit të ditës dhe themelohet komisioni në fjalë. Vazhdojmë me pikën shtatë;

7. Shqyrtimi dhe miratimi i propozim vendimit për dhënien në shfrytëzim afatshkurtër të pronave të paluajtshme të komunës, personave fizik dhe juridik – P- 01043-1, 01035-0, 01039-0 dhe 01036-2, zona kadastrale Xërxë;

Erhan Morina – Faleminderit kryesues, i nderuar kryetar, nënkryetar, drejtorë, anëtarë të kuvendit, media dhe ju të pranishëm. Para jush keni materialin për dhënien në shfrytëzim të një pjese të objektit i cili gjendet në depot e matrexit të fshatit Xërxë dhe sipas certifikatës së pronësisë këto parcela janë pronë e komunës dhe se komuna dëshiron t'i jap në shfrytëzim përmes ankandit publik në periudhë afatshkurtër deri në 15 vite, objekti është i destinuar për zhvillimin e aktiviteteve biznesore dhe sipërfaqja e përgjithshme e saj është 16.219m katror dhe në këtë vendim japim në shfrytëzim vetëm në pjesë të saj në sipërfaqe 1359m katror, poashtu në këtë vendim jepen në shfrytëzim përmes ankandit publik edhe këto parcela P- 01043-1 në vendin e quajtur "Skaja" kultur-kullosë të klasës së tretë me sipërfaqe 5016m katror. P-01035-0 në zonën kadastrale Xërxë në vendin "Skaja" kulturë-arë e klasit të tretë me sipërfaqe 2252m katror. P-01039-0 në zonën Xërxë, vendin e quajtur "Skaja" kulturë-kullosë e klasit të katërt me sipërfaqe 6506m katror. P-01036-2 në zonën kadastrale në Xërxë në vendin e quajtur "suga kot" kultur-arë e klasit e katërt me sipërfaqe 2445m katror. Të gjitha këto prona janë të komunës dhe se qëllimi i dhënies në shfrytëzim është ruajtja dhe rritja e vlerës së pronës komunale, pronat kanë qenë në shfrytëzim të cilave ju mbaron kontrata në gusht të këtij viti dhe drejtoria planifikon t'i jap prapë në shfrytëzim.

Kryesuesi - Faleminderit drejtor, nëse dikush ka diçka rrejt kësaj pike?.. Nëse jo, atëherë po e vendosim në votim, kush është për miratimin e pikës së 7 të rendit të ditës?... Me shumicë unanime miratohet edhe pika e 7 e rendit të ditës...Me propozim të kryetarit, me arsye që një agjendë të lëvizë tutje, propozoj që pika e 17 e rendit të ditës, raporti i punës së kryetarit nëse jeni të pajtimit që t'a vendosim si pikë të 8 të rendit të ditës!... e ftoj kryetarin që të raportoj për punën 6 mujore të ekzekutivit.

Kryetari – Faleminderit kryesues, përshëndetje për anëtarët e kuvendit, nënkryetar, drejtorë, media, monitorues... Ne në muajin e 6 jemi të obliguar ligjërisht t'a paraqesim raportin mujor, kuptohet që raporti 6 mujor financiar nuk është pjesë e këtij raporti, i plotë duhet të bëhet në korrik. Këtu i keni prej një fjale hyrëse, janë zotimet, janë synimet, prioritetet, raportet e zyrave të kryetarit, zyrës ligjore, njësisë të auditimit të brendshëm, zyrës prokurimit, zyrës për barazi gjinore, zyrës për integritet europian. Pastaj janë raportet e secilës drejtori veç e veç, si dhe raporti i zyrës komunale për komunitete dhe kthim. Karakteristikë e këtij raporti është që ne i kemi paraqitur edhe angazhimet edhe aktivitetet, sfidat, arritjet po edhe ngecjet. E ndjej për obligim të ju drejtohem që ne kemi ngecje në investime publike, këto ditë ka disa lëvizje të mira, po është e vërtetë që kemi pas ngecje sepse rritja e çmimeve kanë ndikuar që një pjesë e operatorëve të mos përfshihen në zbatim të kontratave. Kjo karakteristikë nuk ka ndikuar që ne mos t'i kryejmë punët tjera të cilat i kemi. Gjatë kësaj periudhe kemi marr edhe vlerësime, në grantin e performancës jemi komuna e parë. Kemi fituar edhe grante nga ministritë e linjës sidomos nga MAPL dhe janë paraqitur aktivitete që e kanë prekur secilën drejtori të qeverisjes komunale të pasqyruara nga ana e zyrës së kryetarit të komunës. Ky raport është publik, është publikuar edhe në web-faqe që i bie të jetë subjekt diskutimi, unë mirë pres këshilla, propozimet, vlerësimet dhe kritikën të cilat ndikojnë që ne ta bëjmë punën sa më mirë në pajtim me ligjin dhe me obligimet që i kemi marr para qytetarëve. Në ora 2 do të jem në varrim, ka vdekë një nënë e dëshmorit, bashkëshortja e dëshmorit Xhemajl Gashi, do të shkoj aty se nuk bën pa qenë prezent, prandaj kërkoj falje që insistova ta marr fjalën sepse ndoshta kur të kthehem prej

varimit kryhet seanca. Raporti është në faqe zyrtare, faleminderit shumë me çrrastë i falënderoj drejtorët e drejtorive për punën sepse secila drejtori do të paraqes raportin e detajuar dhe do ta publikoj në linkun e drejtorive respektive. Ky është raporti i kryetarit dhe ekzekutivit, raporti i plotë. **Sejfullah Sejfullahu** – Përsëritje, raporti ishte goxha voluminoz, vërejtjet, plotësimet ose diçka që na intereson mundemi t'i shtjellojmë në vazhdimësi edhe në seanca tjera nuk e besoj që është problem, mos të vonohemi...

Kryesuesi – Faleminderit Sejfullah, atëherë po e kalojmë këtë pikë të tetë të rendit të ditës, raportin gjashtë mujor të punës së kryetarit, kalojmë te pika e nëntë;

9.Shqyrtimi dhe miratimi i Propozim vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës P- 01043-1, 01035-0, 01039-0 dhe 01036-2, zona kadastrale Xërxe;

Erhan Morina – Faleminderit kryesues, të nderuar anëtarë para jush keni propozimin për formimin e komisionit për zbatimin e procedurave dhe vlerësimin e ofertave të dhënies në shfrytëzim afatshkurtër deri në 15 vite të pronave të paluajtshme të komunës, bazuar në vendimin paraprak të kuvendit për dhënien në shfrytëzim të pronës së paluajtshme të komunës me nr. të pronësisë 01043-1 01035-0 01039 -0 dhe 01036-2, ky komision do të përbëhet prej 5 anëtarëve; 2 nga ekzekutivi, 2 nga kuvendi dhe 1 përfaqësues nga sektori joqeveritarë.

Kryesuesi – Faleminderit drejtor, ashtu si komisioni i formuar paraprakisht edhe ky komision ka dy të deleguar prej kuvendit komunal, ju ftoj për mirëkuptim që grupet që kanë bërë propozime në komisionet paraprake që dy grupeve tjera t'i ofrohet propozimi; Grupi i LVV-së?

Merisa Sharku – Ne propozojmë Sinan Kryeziun në këtë komision, në komisione tjera lirojmë vend.

Kryesuesi – Faleminderit, grupi i LDK-së?

Lirigzon Kastrati - Përsëritje, në emër të grupit të LDK-së, propozojmë z.Burim Krasniqin.

Kryesuesi – Atëherë meqenëse po pajtoheni me këtë përbërje të këtij komisioni, po e vendosim në votim formimin e këtij komisioni me këtë përbërje; Sinan Kryeziu dhe Burim Krasniqi si dy të deleguar prej kuvendit komunal, kush është për?...Me shumicë unanime formohet edhe komisioni për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës, kështu po e përmbylлим pikën e nëntë e rendit të ditës, vazhdojmë me pikën e dhjetë;

10.Shqyrtimi dhe miratimi i vendimit për Kornizës Afatmesme Buxhetore (KAB) 2023-2025 dhe Qarkores Buxhetore 2023/1;

Afrim Limani – Faleminderit kryesues, përsëritje për nënkryetarin, përsëritje për asamblistët dhe të gjithë të pranishmit. Me datë 15 maj 2022 në adresë të komunës tonë ka ardhur qarkorja e parë buxhetore, në të cilën janë të përcaktuara limitet, tavanet për vitin 2023 si dhe projeksionet për vitin 2023-2025, ky buxhet sipas qarkores së parë buxhetore është prej 17.548.240 kjo rritje, ky total në kuadër të grantit të përgjithshëm të administratës është 7.605.075eu nëse bëjmë krahasim me periudhën e njëjtë të vitit të kaluar ndryshimi pozitiv është 1,844.000eu. Granti arsimit është 5.872.245, krahasimi me periudhën e njëjtë të vitit 2022 ka një zvogëlim prej 93.637eu. Granti i shëndetësisë është 2.638.000, krahasimi me vitin e kaluar është që kemi një rritje prej 648.990eu ndërsa të hyrat vetanake kanë një rritje prej 78.855 që aktualisht do të jenë 1.345.000eu. Në bazë të analizave dhe krahasimeve të viteve paraprake, ne si drejtori e financave shpërndarjen e buxhetit e kemi bërë në kategori ekonomike, jemi bazuar gjithmonë në raportet e zyrës kombëtare të auditorit pastaj edhe sugjerimet nga ministria e financave, duke e ditur që i kemi ikur keq klasifikimeve që deri

më tani janë krijuar, në zbatim të plotë të udhëzimit administrativ atëherë këtë buxhet në kategori ekonomike e kemi shpërndarë kështu;

Pozicioni i pagave 8.453.000 krahasimi me vitin e kaluar, ka rritje prej 580.244eu. Buxheti për mallra dhe shërbime do të jetë 2.203.829 një rritje prej 468.229 pra, kategorinë e mallrave dhe shërbimeve e kemi rritur për shkak të ikjes së keq klasifikimeve në bazë të një analize të bërë. Komunalit janë rritë prej 100.000eu me buxhet total 370.000. Subvencionet janë 820.000eu, krahasimi me vitin 2022 ka një rritje prej 460.000 edhe këtë kategori të shpenzimeve i kemi rritë duke i ikur keq klasifikimeve të cilat janë në kuadër të investimeve kapitale. Ndërsa investimet kapitale do të jenë 5.701.000, krahasimi me vitin 2022 kemi një rritje 885.507eu. KAB-in si dokument e kemi punuar shumë, jemi përgatitur shumë. Në kuadër janë të përcaktuar objektivat, strategjitë, prioritetet sipas sektorëve dhe sipas programit të kryetarit të cilën e ka paraparë në periudhën 3 vjeçare. Kemi bërë edhe shpërndarjen e të hyrave vetanake 2023-2025 projeksionet si dhe shpërndarjen e buxhetit, për fund një informatë; Te planifikimi i të hyrave për vitin 2023 te taksa për legalizimin e objekteve, një vendim sa kemi informata skadon në muajin shtator, ndërsa ne e kemi bërë planifikimin më shpresë që ky vendim prapë të afatizohet, sipas praktikave kështu ka ndodhur edhe më herët. Në dilemë jam por si planifikim ekziston, nëse ju keni ndonjë mendim mundeni të më ndihmoni në këtë pikë, në bazë të opinionit të juaj, d.m.th është fjala për taksën e legalizimit të objekteve. Për fund një lutje për votimin e kësaj qarkoreje buxhetore, sipas ligjit të buxhetit dhe në bazë të një formule që e ka caktuar "hisën" tonë në këtë buxhet.

Burim Krasniqi – Faleminderit kryesues, e kam përsëritur edhe më herët nëse gaboju ndonjëherë mos ma zini për të madhe sepse nuk jam ekonomist, jam inxhinier me profesion. KAB-in e kam lexuar me kujdes, ajo që më ka rënë në sy janë disa prej çështjeve. Te faqja 15-16 te planifikimi i të hyrave vetanake te rasti i inspektionit kemi një rritje të gjobave, faktikisht 2022 ka qenë 1000, 2023 është 5000, 2024 prapë 5000 ndërsa në 2025 është 10.000, kjo a nënkupton që do të rritet mos disiplina e bizneseve që duhet gjobitur apo ku është problemi?... Te shfrytëzimi i pronës publike, te shërbimet publike kemi rënie të të hyrave vetanake ndër vite, përderisa në vitin 2022 kanë qenë 4500, në 2023 është 3000, në 2024 – 2000eu, prapë në 2025 është 2500, është një far planifikimi joserioz i kësaj çështje, njësoj ndodh edhe çështja e qirasë së objekteve, sivjet e kemi 4700, bie në 3000 e tani shkon në 5000 këto kërcime në KPF kam thënë që janë pak të çuditshme ose është papërgjegjësi kur është bërë KAB-i ose mos aftësi, njëra prej dyjave del. Te bujqësia – zhvillimi rural, shfrytëzimin e pronës publike e kemi rregullisht në 2022 1000eu në 2024 1000 në 2025 1500eu pra d.m.th duhet të jetë së paku një rritje, e jo në mënyrë lineare. E njëjta gjë shkon edhe për taksat ndërrimin e destinimit të shfrytëzimit të tokës, 2022-1000eu, 2023-1000, 2024-1000, 2025- 0euro... Te urbanizmi është pak më shumë e çuditshme te taksat komunale për leje ndërtimi janë disa shifra që nuk i kuptoj, ose vetëm i kanë qitë pa analizë, thotë; 2022 i ka 44.000, 2023 i ka 36.000eu, 2024 – 41.000eu dhe 2025 – 36.000eu janë disa kërcime të palogjikshme dhe nuk është diçka variabël, nuk është diçka që rrjedh, dhe te respektimi i planit urbanistik janë të hyrat vetanake ka 2000euro vazhdimisht përveç vitin e fundit që shkon me 2200eu. Te faqja 17 pika 3.2.1 donatorët e jashtëm ndërkombëtar, financimi nga donatorët e jashtëm gjatë vitit 2023-2025 presim që do të kemi donacione! A ka ndonjë projekt madhor, ndonjë projekt me perspektivë për të ardhmen, a ka ndonjë negociim deri tani, aplikacion? Sepse në çoftëse ka aplikacion për 2021-2021 nuk është projekt që zhvillohet për 6 muaj por shkon tutje, e shpreh gatishmërinë për punë, por nuk ka diçka që ndodh defakto. Drejtor, te pagat dhe mëditjet ka 13.6% rritje të shpenzimeve, duket pak si shumë po prapë është vlerësim i juaji.

Huamarrja e jashtme 000 komplet, ndoshta nuk ka ndonjë projekt që llogaritet, najë farë BERZH-i, ose dikush tjetër që komuna mund të merr kredi, duke pasur parasysh se minimumi që duhet të merret në konsideratë është kanalizimi i komunës që është copëza copëza dhe shfaq rrezik për shumë lokalitete. Te tabela e shpenzimeve faqe 21,22,23,24 tabelat 4,5,6,7 te çështja e pagave a hyjnë edhe mëditjet apo vetëm pagat, drejtor? (vetëm pagat). Zyra e kryetarit ka vazhdimisht rritje të pagave dhe për befasi është goxha afër komplet administratës, 2022 – 174.457euro i ka zyra e kryetarit, vetëm 216.182 i ka e gjithë administrata, 2023 – 178.520euro i ka zyra e kryetarit e 217.000 i ka komplet administrata. I njëjti trend vazhdon rritja edhe për 2024-2025, më duket që nuk është vetëm paga në pyetje, ndoshta i kanë pagat më të larta zyra e kryetarit me stafin e vet, por është e tepërt të jetë sa e gjithë administrata, së paku kështu mendoj unë edhe ndoshta janë punëtorët e punësuar dhe nuk mund t'i ikim kësaj. Te çështja e subvencioneve, zyra e kryetarit 2022 i ka 129.000euro këtë që e diskutuam paraprakisht e që nuk pajtohem, në 2023 subvencionet te zyra e kryetarit 160.000eu. Te kultura, rinia dhe sporti mbetet 100,000euro e njëjtë me vitin e kaluar, a nënkupton kjo që nuk do të përkrahet sporti 2023-2024-2025 sepse shkon 100.000 deri në 110.000 shkon njëjtë dhe nënkupton që rritje të aktiviteteve kulturore nuk do të ketë, te shtëpia e kulturës do t'a leni derën e mbyllur si e keni lënë deri tash. Konsideroj dhe propozoj që prej zyrës së kryetarit subvencionet të kthehen në 100.000eu dhe te kultura, rinia dhe sporti të kalojë në 160.000euro dhe të kemi në konsideratë sportin, kulturën dhe rininë, të njëjtën gjë propozoj të jetë edhe në 2024-2025 meqenëse është kornizë afatmesme buxhetore, sepse në këtë format që shihet nuk është serioziteti i mjaftueshëm në raport me sportin, rininë dhe kulturën. Te zhvillimi ekonomik është një subvencion prej 20.000euro ndër vite, një pyetje; çka subvencionon drejtorja e zhvillimit ekonomik? Cilat kategori?

Kryetar, te investimet kapitale, te arsimit fillor për 2023 janë vetëm 63.084euro, te arsimit i mesëm 30.200euro, te administrata e arsimit janë 159.395euro. Në 2024 arsimit fillor i ka 63.000euro në 2025 i ka 302.000, kur ti rrumbullaksojmë të gjitha nuk bëhet 400.000euro. Po e marr një mesazh që këto shkolla; në Pastasel, në Xërxe, aneksi i shkollës në Ratkoc dhe nevojat tjera e këtu nuk është e planifikuar, konsideroj që duhet t'a kemi parasysh këtë çështje sepse kur të vijmë te buxheti të themi që nuk është planifikuar është e papranueshme. Propozoj që të rritet buxheti te investimet kapitale te arsimit fillor dhe i mesëm si projeksione buxhetore, pasi buxheti i detajizon dhe të rriten subvencionet në kulturë, rini sport, të reduktohen subvencionet te zyra e kryetarit. Te faqja 18, pika 3.1.2 e keni një gabim teknik të vogël thotë; viti 3 me siguri është 2023. Faleminderit shumë, respekt.

Afrim Limani - Burim, faleminderit për pyetjet dhe që i ngrite këto çështje, do të tentoj të përgjigjet me radhë; Te planifikimi i të hyrave, kemi diskutuar shumë edhe në mbledhjet e tjerat, kur kemi diskutuar për raportet periodike financiare ne e kemi një limit prej 1.445.000euro, në faqen nr.15 tatimi në pronë është 423.000, tatimi në tokë është 367.000.. këto lloj të tatimeve përbëjnë këtë shumë 880.000 dhe janë të përcaktuara me ligj limitet dhe tavanet në kuadër të departamentit të buxhetit të ministrisë së financave, brenda kësaj vlere ne duhet t'a bëjmë planifikimin e të të hyrave, e kështu po dalim jashtë planifikimit real sepse detyrimisht duhet t'i zvogëlojmë disa lloj të të hyrave në mënyrë që të arrijmë këtë limit që e kemi, e pranoj që nuk është një planifikim real por duhet patjetër të përshtatet tavanin që e kemi prej 1.445.000 nuk guxojmë t'i ikim. Te projeksionet, të them të drejtën nuk iu kam dhënë rëndësi të madhe sepse për çdo vit ndryshojnë dhe nuk mbesin të njëjta, por është një formalitet që duhet të plotësohet. Te donacionet, komuna e Rahovecit vazhdimisht ka pas dhe do të ketë, por ne në qarkore i kemi përfshirë vetëm ato që janë të regjistruara në sistem, në këtë kornizë të buxhetit çdo gjë është e përcaktuar me ligj dhe për këtë arsye duhet t'i përfshijmë vetëm në kuadër

të sistemit. Te shpërndarja e buxhetit, te planifikimi i buxhetit në kategori; te paga dhe mëditjet; këto janë të njëjta, nuk ndryshojnë, kjo rritje është si rezultat i përvojës së punës me 0.5%, pagat mbesin të njëjta, kategoritë tjera ne i kemi rritur për arsye të ikjes së keq klasifikimeve, e në anën tjetër kemi rritje të buxhetit prej 2.448.000euro. Subvencionet në kulturë d.m.th janë të vogla në krahasim me zyrën e kryetarit, të them të drejtën këtu i kemi dhënë prioritet të madh planifikimit të shpenzimeve, gjithmonë duke shikuar mostrat e kaluara dhe karshi nevojave dhe kërkesave që do të vijnë në të ardhmen. Konsideroj që 100.000euro subvencioneve në kulturë karshi kërkesave janë të mjaftueshme e në anën tjetër zyra e kryetarit i ka goxha disa kërkesa dhe shpenzime që mund t'i shihni edhe në raporte periodike financiare, ta dimë që në kuadër të zyrës së kryetarit janë edhe bursat për student që janë përafërsisht 80.000euro, pastaj zyra e kryetarit lëshon vendime të ndryshme, për persona me nevoja të veçanta, për shëndetësi et... dhe konsideroj që shuma prej 160.000 euro është e mjaftueshme këtu dhe 100.000 janë të mjaftueshme në kulturë. Investimet kapitale; unë thash në fillim që pjesën e investimeve kapitale do t'a votojmë dhe to ta diskutojmë në shtator, këto janë vetë projeksione dhe sipas ligjit drejtorive respektive i takojnë po aq para dhe nuk guxojmë të dalim jashtë kësaj qarkore, po ne gjithsesi viteve të kaluara dhe deri më tash janë rritur si drejtoria e arsimit tani i ka rreth 600.000euro investime kapitale, sepse kodi i administratës së përgjithshme ka të drejtë të financoj grantin specifik të arsimit dhe shëndetësisë e ndërsa ata nuk kanë të drejtë me neve. Këto janë Burim, faleminderit shumë.

Nora Boshnjaku – Burim, një pyetje e bëre për planifikimin e gjobave në inspektoriat, jo ne nuk kemi ardhur t'i gjobisim bizneset, të dëgjova me vëmendje. Një gjë interesante që për dallim prej viteve tjera, ne e kemi pasur një realizim pak më ndryshëm që i bie kemi gjeneruar më shumë se sa duhet. Shembull; deri tani kemi pasur 6000euro të hyra dhe nëse planifikohet për vitin tjetër më pak se që realizohet, atëherë veç që ia lehtësojmë punën vetvetes, në këtë rast kishim pas dëshirë që mos të shqiptojmë gjoba hiç, por janë disa procedura që ti i njeh më mirë. Ne nuk kemi ardhur të planifikojmë sepse nuk mund t'i dimë sa keqbërës janë, sepse ne nuk i gjobisim vetëm bizneset, ne kemi sektor të mjedisit, ndërtimtarinë, ka ardhur edhe ligji mbi inspektimet, jemi të detyruar të planifikojmë e "ishalla nuk i realizojmë" sepse nuk kemi ardhur t'i gjobisim qytetarët por nëse kemi situata që shfaqen në ndërtim, në mjedis, në inspektoratin sanitarë që tani ka kaluar në kuadër të AVUK-ut atëherë duhet t'i shfrytëzojmë të gjitha këto mjete, përndryshe ne gjenerojmë edhe të hyra prej kërkesave të qytetarëve që na bëhen për inspektime, prej pëlqimeve të punës etj.. kështu që është mirë të na kontaktoni, bisedojmë edhe ju shpjegojmë, nuk është që kemi rritur planifikim që ti gjobisim qytetarët, mirëpo realizimi është tjetër dhe dalim më mirë nëse planifikojmë të hyra të tjera.

Burim Krasniqi – Drejtor i financave fillimisht, te çështja e subvencioneve te kulturë, rini dhe sport, besoj që drejtori nuk do t'a lejoj që kështu të vazhdohet kultura e rinia, pa sportin që po e tërheqim sportin, planifikimi buxhetor shkon 2024-2025 100.000-110.000 e tani në 2023 është 100.000 i njëjtë me vitin 2022, kjo nënkupton që nuk do të ketë teatër amatorë, nuk do të ketë teatër për fëmijë, nuk do t'i hapet dera këtyre shtëpive të kulturës në Krushe, Ratkoc, Xërxe, Drenoc përpos kur mbajmë aktivitete politike ose dëgjime publike tjetër gjë nuk ka në të. Konsideroj që kjo e kufizon mundësinë që drejtoria kulturë, rini dhe sport t'i qaset më mirë financiarisht punës. Unë e kuptoj dhe besoj se te çështja e sportit ndoshta edhe keni të drejtë, që me kalimin e kohës bashkëpunohet në mes bizneseve edhe sporteve që të kalohet prej subvencioneve në donacione meqenëse e lejon ligji për financimin e OIQ-ve dhe klubeve sportive. Drejtoresh, çështja e gjobave është decidive, inspekcioni thotë; gjoba nga inspektorati 2022-1000, në 2023-5000euro, 2024-5000, në 2025-10.000eu. Besoj që kur t'i

dënimi 200-300 në 2023 e 200-300 në 2024 do të bie numri sepse do të vetëdijesohet, e jo në këtë rast të rritet numri i atyre që duhet të dënohen. Drejtor, te investimet kapitale meqenëse na dhe një arsyetim; a nënkupton që nuk e bllokon mundësinë e financimit në arsimin fillor dhe të mesmen në të ardhmen me këtë kornizë buxhetore?...

Afrim Limani – Burim, po e përsëris edhe një herë, buxhetin e kemi votuar në shtator, kemi parë që pjesa e investimeve kapitale për drejtorinë e arsimit do të ketë rritje, 500.000 po, por edhe më tepër që kaq. Granti i përgjithshëm i administratës, në këtë rast që jemi në drejtorinë ka të drejtë të financojmë grantin specifik për arsim dhe shëndetësi kjo është e rregulluar me ligj, kështu që ne mundemi t'i furnizojmë ata, e ata neve kështu që të garantoj që buxheti për investime kapitale për arsim do të jetë mbi 500.000euro.

Kryesuesi – Faleminderit drejtor, nëse nuk ka dikush ndonjë gjë lidhur me këtë temë, atëherë po e vendosim në votim pikën e dhjetë të rendit të ditës, kush është për?...kundër?...abstenim?...Me 16 vota për, dhe 2 abstenime miratohet edhe vendimi për kornizën afatmesme buxhetore dhe qarkoren buxhetore, kalojmë te pika e njëmbëdhjetë e rendit të ditës;

11. Shqyrtimi dhe miratimi i propozim vendimit për dhënien në shfrytëzim afatshkurtër të pronave të paluajtshme të komunës personave fizik dhe juridik – P-01038-2, 01055-2, 01034-0, 01045-0, 01033-2, 01044-0, 01040-0, 01036-2, zona kadastrale Xërxë;

Erhan Morina – Faleminderit kryesues, të nderuar anëtarë të kuvendit, para jush keni materialin për dhënien në shfrytëzim të pronave të paluajtshme të cilat gjenden te depot e Matreksit në Xërxë, sipas certifikatës së pronësisë janë prona të komunës dhe se komuna dëshirën t'i jap në shfrytëzim përmes ankandit publik në periudhë afatshkurtër deri në 15 vite, bëhet fjalë për parcelat; 01038-2 në zonën kadastrale Xërxë, vendi Skaja, zonë e klasit të 4 me sipërfaqe 1231 m katror, P-01055-2 në zonën kadastrale Xërxë, vendi Skaja, me kulturë kullosë e klasit të dytë me sipërfaqe 362m katror, parcela me nr. të certifikatës së pronësisë 01034-0 në Xërxë, vendi Skaja, me kulturë arë e klasit të tretë me sipërfaqe 549m katror, P-01045-0 në zonën kadastrale në Xërxë në vendin e quajtur Suga kot, me kulturë e klasit të tretë me sipërfaqe 4138m katror, P-01033-2 në zonën kadastrale në Xërxë në vendin e quajtur Skaja me kulturë arë e klasit të tretë me sipërfaqe 2162m katror, P-01044-0 në zonën kadastrale Xërxë, vendi Skaja, me kulturë të klasit të tretë me sipërfaqe 2142m katror, P-01040-0 në zonën kadastrale në Xërxë me sipërfaqe 1491m katror dhe se për shfrytëzim jepet vetëm një pjesë e kësaj sipërfaqe 400m katror, P-01036-2 në zonën kadastrale në Xërxë, vendi Suga kot me kulturë arë e klasit të katërt me sipërfaqe 2445m katror dhe se në shfrytëzim jepet vetëm një pjesë e saj me sipërfaqe 1700m katror, qëllimi i dhënies në shfrytëzim të këtyre pronave është ruajtja dhe rritja e vlerës së pronës komunale, ftoj anëtarët e kuvendit për votim në këtë pikë.

Kryesuesi – Faleminderit drejtor, a ka dikush të shtoj diçka rreth kësaj pike të rendit të ditës, nëse jo, atëherë po e vendosim në votim pikën e njëmbëdhjetë të rendit të ditës; kush është për?...me shumicë unanime aprovohet kjo pikë, vazhdojmë me pikën e dymbëdhjetë të rendit të ditës;

12. Shqyrtimi dhe miratimi i propozim vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës P-01038-2, 01055-2, 01034-0, 01045-0, 01033-2, 01044-0, 01040-0, 01036-2, zona kadastrale Xërxë;

Erhan Morina – Faleminderit kryesues, të nderuar anëtarë, para jush keni propozimin për formimin e komisionit për zbatimin e procedurave dhe vlerësimin e ofertave në shfrytëzim afatshkurtër deri në 15 viteve të pronave të paluajtshme të komunës. Bazuar në vendimin paraprak të kuvendit për

dhënien në shfrytëzim të pronës të paluajtshme të komunës me nr. 01043, 01035-0, 01039-0 dhe 01036-2 ky komision përbëhet prej 5 anëtarëve, 2 nga kuvendi komunal, 2 përfaqësues nga ekzekutivi dhe një përfaqësues nga sektori joqeveritar.

Kryesuesi – Faleminderit drejtor, atëherë njëjtë sikur në dy komisionet e formuara të mëhershme edhe në këtë komision 2 anëtarë delegohen prej kuvendit komunal, ju ftoj për propozime;

Besmire Bytyqi (AAK) – Ne propozojmë kolegun tonë këshilltar, Feriz Thaqin edhe për këtë komision!

Merisa Sharku (LVV) – Nuk kemi propozim!

Edona Kryeziu (LDK) – LDK-ja nuk ka propozim!

Sejfullah Sejfullahu (PDK) – Melinda Oruqin!

Kryesuesi – Faleminderit për mirëkuptimin për të gjithë grupet e asamblistëve, atëherë dy anëtarë të deleguar nga kuvendi komunal, janë Feriz Thaqi dhe Melinda Oruqi, me këtë përbërje po e vendosim në votim pikën e dymbëdhjetë të rendit të ditës, kush është për?... Me shumicë unanime miratohet kjo pikë e rendit të ditës, vazhdojmë me pikën e trembëdhjetë, por së pari 5 minuta pauzë më pas rikthehemi ...

Kryesuesi – Përsëritet edhe një herë, po e vazhdojmë seancën, kemi mbete te pika e 13-të;

13. Shqyrtimi dhe miratimi i propozim vendimit për dhënien e pëlqimit për këmbimin e pronës publike komunale me pronën e institucionit qendror për interes publike;

Afrim Oruqi – Faleminderit kryesues, të nderuar anëtarë të kuvendit, para jush sipas ligjeve në fuqi, keni vendimin për këmbimin e pronës komunale me pronë të institucionit qendror, bëhet fjalë për zonë kadastrale në pastasel, pra po kërkohet të jepet pëlqimi për këmbimin e pronës publike komunale me pronën e institucionit qendror për interes publik që gjendet në vendin e quajtur Rezinë, zonë kadastrale Pastasel me nr. 944-0, sipas certifikatës së pronësisë është e komunës së Rahovecit me sipërfaqe prej 10 ari nga pjesa e përgjithshme prej 33ari e 21m katror i jepet ekonomisë së pyjeve me nr. të pronësisë 386-1 e cila është në emër të pasurisë shtetërore të Kosovës KK Rahovec, shfrytëzues; ekonomia e pyjeve Rahovec me sipërfaqe prej 2 hektar 20 ari e 5m katror, i merret pronës komunale sipas nr. të cekur më lartë dhe i jepet agjencionit pyjor në shfrytëzim prej 10 ari, po kërkojmë pëlqim prej juve që të këmbejmë pronën komunale me pronë e cila është nën menaxhimin e agjencionit pyjor në sipërfaqe të njëjtë prej 10 ari. Ftoj anëtarët e kuvendit që t'a votojnë këtë pëlqim.

Sejfullah Sejfullahu – Dëshiroja të dija që a ka edhe pronë tjetër aty, apo vetëm kjo që foli drejtori, më fal drejtor por e kam nga kureshtja, e jo me prishë punë.

Afrim Oruqi - Për shkak të ekonomizimit të kohës, nuk e përmenda që në landë e një raport të komisionit të cilin e formon kryetari i komunës i cili është në përbërje prej gjeodetëve, juristëve dhe zyrtarëve tjerë, këta e kanë për obligim daljen në terren dhe të përpilojnë një raport ku vlerësojnë llojin e pronës, shfrytëzimin aktual etj.. Uroj që mos të na kthehet, sepse ne po ia marrim agjencionit pyjor të Kosovës brenda fshatit Pastasel, është zonë ndërtimore. Është në interesin tonë sepse vlera është shumë më e mirë ku po marrim, se sa ku po e japim. Ka një raport të anëtarëve që e keni me shkrim, ku është vlerësuar që është përafërsisht e përafërt me llojin e pronës që këmbëhet.

Kryesuesi – Faleminderit drejtor, dikush tjetër?... Nëse jo, atëherë po e vendosim në votim pikën e trembëdhjetë të rendit të ditës, kush është për?... Me shumicë unanime aprovohet edhe pika e 13-të e rendit të ditës, kalojmë te pika e katërbëdhjetë;

14. Shqyrtimi dhe miratimi i Propozim vendimit për shfuqizimin e vendimit 01-Nr. 306/22 i datës 29.04.2022 për formimin e komisionit për emërtimin dhe riemërtimin e rrugëve, rrugicave, parqeve, shesheve, lagjeve në komunën e Rahovecit i ndryshuar dhe plotësuar me vendimin 01-Nr. 334/22 të datës 31.05.2022;

Mirsad Shala – Faleminderit kryesues, i nderuar nënkryetar, drejtorë të drejtorive, asamblistë... Komuna e Rahovecit ka marr vendim me nr.306/22 për formimin e komisionit për emërtimin dhe riemërtimin e rrugëve, rrugicave, parqeve, shesheve, lagjeve në komunën e Rahovecit. Pas konfirmimit të MAPL-së dhe ministrisë së mjedisit dhe planifikimit hapësinor në seancën e mbajtur më 31 maj e kemi plotësuar dhe ndryshuar konform shkresave të ministrive të lartcekura. Mirëpo prapë para disa dite ka ardhur konfirmimi që prapë duhet të hyn në konfirmim të ligjshmërisë, brenda afateve ne jemi të obliguar që t'a shfuqizojmë dhe në seanca tjera, të shohim se ku qëndron problemi edhe pse viteve të kaluar ka qenë komisioni i njëjtë. Duhet shfuqizuar për shkak afateve kohore.

Burim Krasniqi – Në fillim të seancës thash që vendimet që duhet të shfuqizohen duhet të vijnë me material shoqërues, është e jo mjaftueshëm bindëse të themi; marrim një vendim për të plotësuar një tjetër, tani duhet të marrim një vendim që t'i shfuqizojmë dy vendime. Pse ka ardhur një shkresë me arsyetime të paarsyeshme, nuk po e kontestoj që kërkesa për shfuqizim të vendimit është në rregull, e as nuk po them që zyrtari ligjor na thotë atë që nuk qëndron, por secili asamblistë duhet të jetë i informuar se çka po votojmë, me këtë format është shumë hipotetike, votojmë të shfuqizojmë diçka që e kemi votuar dje, e kemi plotësuar prapë dhe në fund po e shfuqizojmë pa e pasur materialin edhe pse kur ka ardhur për plotësim ndryshim prapë nuk ka pasur material shoqërues, e dyta herë përsëritet i njëjti send.

Kryesuesi – Faleminderit Burim për këtë kritik me vend edhe unë jam për njoftimin e anëtarëve të kuvendit në atë moment kur prej autoritetit mbikëqyrës kërkohet që të rishikohet vendimi i marr në seancat e rregullta të kuvendit, besoj që zyra ligjore ose zyra e kuvendit në momentin kur e pranojnë vendimin prej MAPL-së atëherë të iu dërgohet anëtarëve të kuvendit për njoftim paraprak... Atëherë po e vendosim në votim shfuqizimin e këtij vendimi, d.m.th pikën e 14 të rendit të ditës, kush është për?... Me shumicë unanime shfuqizohet vendimi nr.306/22... vazhdojmë me pikën e pesëmbëdhjetë;

15. Shqyrtimi dhe miratimi i propozim vendimit për shfuqizimin e vendimit 01 Nr. 333/22 i datës 31.05.2022 për shpalljen me interes të përgjithshëm publik parcelën P-71513005-02756-0 në Zonën kadastrale Krushë e Madhe;

Erhan Morina – Faleminderit kryesues, të nderuar anëtarë të kuvendit para jush keni materialin për shfuqizimin e vendimit të datës 31.05.2022 për shpalljen në interes të përgjithshëm për parcelën nr. të certifikatës së pronësisë 02756-0 në zonën kadastrale Krushë e Madhe, kjo pikë realisht është kthyer nga MAPL-ja për faktin që në këtë zonë sipas PZHK-së së vjetër nuk është paraparë ndërtimi i objekteve, ndërsa kërkesa jonë ka qenë për shpallje në interes të përgjithshëm e që më vonë ta shpallim si hapësirë për biznese dhe kjo ka qenë arsyeja se MAPL-ja e ka kthyer këtë pikë të rendit të ditës dhe ne me miratimin e PZHK-së së re, planifikojmë që në këto zona të lejohet ndërtimi e më pas do t'a vendosim prapë në kuvend.

Sefjullah Sejfullahu – Drejtor, unë edhe paraprakisht u konsultova me juve dhe desha të them që zyra ligjore duhet të shqetësohet për këto gjëra, ta dinë çka të votojmë në kuvend e çka mos të votojmë sepse është bërë një far "luftë" i gjithë ai hidhërim me njerëz të zonës atje, e tash të anulohet, shumë absurde kjo formë, e pafalshme kjo dhe sinjerisht po më vije inat.

Burim Krasniqi – Për sa po arrij të kuptoj, më duket që është rasti që kemi diskutuar rreth 3 orë që t'a vendosim në rend dite, me arsyetimin që po nuk hyri në rend të ditës aty bëhet "kërrsh" me uzurpime dhe nuk bënë të shtyhet për seancën e rregullt, duhet patjetër të vendosim. Çka ndodh tani kur të kalon PZHK-ja, a bëhet skandali që është prezantuar këtu, a e marrim këtë parcelë apo çka bëhet? Në çoftëse atëherë nuk ka mund të shtyhet për një seancë tjetër (një muaj) tash duhet të shtyhet për 5-6 muaj, çka ndodh tani?.. Kjo nënkupton që atëherë nuk ka qenë rreziku i prezantuar ose tash duhet t'a gëlltisim rrezikun dhe të lejojmë të bëjnë çfarë të dëshirojnë aty pari. Të jemi pak më serioz, po flas për ekzekutivin, kur të insistojmë diçka me hy në rend të ditës me një arsyetim shumë të fuqishëm, të jemi pak më solid në arsye. Për mua është obligim shfuqizimi për shkak të obligimeve ligjore që dalin, kështu që mos të vijmë në situata që për diçka insistohet e defakto nuk ekziston. Në fillim më kanë këqyr pak çuditshëm kur kam thënë që mos të marrim vendime që e vendosin kuvendin në lajthitje, kjo është lajthitje e kuvendit siç kanë qenë poashtu edhe dy vendimet më herët.

Ilir Pallqa - Faleminderit kryesues, nëse ka mundësi tjetër herë t'a bashkëngjitni vendimin e MAPL-së që ne ta kemi situatën më të qartë dhe po i bashkëngjitem hallit të kolegëve, Sejfullahut sidomos. Kryetari jepke goxha "zor" për përfundimin e kësaj pune dhe vazhdimisht u mbështeste në përvojën e tij "500 vjeçare" si ekzekutiv, tani ose nuk din ose po manipulon, sepse vazhdimisht të gjitha vendimet po kthehen, a punon dikush këtu, a jo? Zyra ligjore? e krejt?...

Sinan Kryeziu – Faleminderit kryesues, në lidhje për këtë çështje është një shprehje e mirë "tuj pa tuj bo" kështu që ndërkohë mund të ia marrin dorën.

Afrim Oruqi – Pyetja e kuvendarit Sejfullah Sejfullahu në lidhje me vendimin e MAPL-së për kundërligjshmërinë e vendimit për interes të përgjithshëm, parcela në fjalë është pronë shtetërore e Kosovës KK Rahovec – Ujërat, këto parcela që shkruan "Ujërat" nuk menaxhohen prej kuvendit komunal të Rahovecit. Në ministrinë përkatëse që i vlerëson ligjshmëritë e këtyre vendimeve, ka dy muaj na kthehen vendime që ne nuk i kemi në menaxhim, ndoshta kanë pranuar zyrtarë të ri... Në vendim të kundërligjshmërisë thotë; Arsyeja që ky vendim është kthyer mbrapa si i kundërligjshëm është që pronat që janë komunës nuk keni nevojë t'i shpallni në interes të përgjithshëm, vazhdoni caktoni hapësirë për lokacione, nëse shkruan në certifikatë PZHK – Ujërat, menaxhohet prej agjencionit i cili është në kuadër të ministrisë së mjedisit, nuk e ka lexuar asnjëri nga ju! Ne kemi dashtë që atë parcelë që është e agjencionit të ujërave t'a shpallim interes të përgjithshëm dhe pastaj ta kthejmë këtu në kuvend dhe ta caktojmë si hapësirë për biznese, në vendimin e kaluar që e kanë shpallur të kundërligjshëm, te qëllimi; kemi shkruar që qëllimi ynë është t'a bëjmë hapësirë për biznese. Ky kuvend në mandatin e kaluar ka shpallë në interes të përgjithshëm parcela që janë në menaxhim të ujërave e që janë kthyer të ligjshme prej këtij sektori, prej MAPL-së e prej këtyre zyrtarëve. Në pyetjen e kuvendarit Burim Krasniqi dhe kuvendarit Ilir dhe të Sinanit në lidhje me këto që a ka mundësi këto gjëra të shikohen më mirë. Brenda kohës sa keni qenë duke ndenjur në pauzë, neve na ka ardhur një vendim në një zarf tjetër për ligjshmërinë e një akti, tash dua ta citoj se si ia japin miratimin një vendim të një kuvendi këta zyrtarë. Ju në mbledhjen e kaluar keni formuar një kryesi për këshillin e fshtatit Hoçë e Madhe, pra d.m.th. komision obligativ, e ata thonë kështu; Për kryetarin e komunës dhe kryesuesin e kuvendit; Konfirmohet ligjshmëria e aktik, (e nënshkruar prej ministrit të MMPH z.Liburn Aliu) Vendimi nr.328-22 për miratimin e listës së anëtarëve të zgjedhur të këshillit të fshtatit Hoçë e Madhe miratuar nga KKK (Komision i kuvendit komunal), thotë është i ligjshëm dhe në arsyetim thotë; Kuvendi komunal me rastin e nxjerrjes së vendimit është bazuar në dispozitat ligjore për fshatin Hoçë e Madhe dhe në udhëzim administrativ për themelimin

zgjedhjen, përgjegjësitë dhe funksionimin e këshillit të fshatit andaj si i tillë vendimi prodhon efekte juridike meqenëse lokacioni për ndërtimin e objektit, (po çfarë objekti në Hoçë të Madhe, këshill kemi formuar në kuvend) – Skandal, ja me kënd punojmë ne, brenda dy muajve na kthejnë vendimet, tash ju printoj edhe ju jap të gjithëve, deri sa këta zyrtarë atje ia marrin dorën punës, uroj të ia marrin shpejt, ne obligohemi brenda 30 ditëve t'i shqyrtojmë, plotësojmë ...

Kryesuesi – Besoj që është gabim teknik i atyre zyrtarëve në MAPL, përndryshe gabimet teknike falen besoj, por vërejtjen e kuvendarëve Ilir Pallqa dhe Sinan Kryeziu ishin me të drejtë.

Sejfullah Sejfullahu – Drejtor, faleminderit për sqarimin të cilit e thatë pak me cinizëm ishte, por të faleminderit shumë, e kuptoj që neve MAPL na ka bërë me hile, atëherë unë po insistoja që ne t'i padisim dhe mos ta shfuqizojmë hiç vendimin tonë.

Ilir Pallqa – Po të kishte qenë në rregull e gjitha, këta e kishin bashkangjitur vendimin e MAPL-së, unë dyshoj në manipulime.

Besë Bytyqi – E falënderoj drejtorin Afrim që na tregoj se çfarë qeverisje amatore e kemi në Prishtinë, po ndoshta ndonjë dajë i nipit të Liburn Aliut ndoshta e ka shkruar, e ata nuk dinë. Drejtor, ndoshta ia marrin dorën.

Kryesuesi – Faleminderit shumë, politikat nacionale janë goxha të rënda, atëherë jemi te pika e 15-të e rendit të ditës, te shfuqizimi i vendimit 01 nr. 333-22 i datës 31.05.2022, kush është për?...Me shumicë unanime shfuqizohet ky vendim, jemi te pika e 16-të e rendit të ditës;

16. Informatë nga drejtoria për Bujqësi, Pylltari dhe Zhvillim Rural;

Berat Duraku – Faleminderit kryesues, të drejtuar drejtorë, anëtarë, para jush keni dokumentin që paraqet informatën për periudhën gjashtë mujore të drejtorisë së bujqësisë. Ky raport është i shpërndarë në dy periudha, pjesa e parë ka të bëjë me aktivitetet të cilat janë zhvilluar me takime të ndryshme, ndërsa pjesa e dytë me pjesë e investimit kapital që investohet në kuadër të drejtorisë së bujqësisë. Përpara e keni materialin, besoj që e keni lexuar, unë desha të ndalem vetëm te fermerët të cilët kanë aplikuar për fazën e pagesave direkte për vitin 2022. Siç e shihni para jush e keni një tabelë, gjithashtu është edhe në materialin e juaj, ku janë të grumbulluar të dhënat e fermerëve të cilët kanë aplikuar për fazën e pagesave direkte të cilat janë të rregulluara sipas sektorëve, kemi edhe krahasimin 2020-2021 dhe 2022. Në fund e keni diferencën e vitit 2022 në raport me vitin 2021, këtu shihet rritja ose zvogëlimi i fermerëve që kanë aplikuar. Në sllajdin tjetër mund të vëreni që sektori i drithërave ka pas një rritje shumë të madhe në këtë pjesë të aplikimit i fermerëve duke e krahasuar me hektar vitin 2021 ishin 2019ha në këtë vit i kemi 3711ha, kjo nuk do të thotë që vitin e kaluar nuk kemi mbjellë drithëra, por për shkak të disa problemeve të shfaqura gjatë aplikimit të cilin ne e kemi kundërshtuar ashpër, fermerët nuk kanë mundur të aplikojnë. Si rezultat i kësaj këtë vit kemi rritje të sipërfaqeve për 92.6%. Sektori i vreshtarisë nuk ka pas dallime të mëdha për këto vite, krahasuar me sektorin e verëtarisë, ku këtë vit si rezultat i mungesës së tregut të prodhuesve të verës, sigurisht ka ndikuar edhe pandemia, i kemi rreth 1.414.000L më pak prodhim të verës për vitin 2022 të deklaruar për ministrinë e bujqësisë. Në sektorin e perime-kulturës, edhe këtu nuk ka patur shumë dallim, dihet që perimekultura dominohet prej 4 kulturave; specit, patates, lakrës edhe qepës, rreth 150 ha dominohet prej kungullit, shalqinit edhe pjeprit, këtu kemi rritje. Këtu ka qenë një gabim teknik i ministrisë që i ka stimuluar bujqit e Rahovecit për mbjellje të kungullit e që në fillim është thënë që do të paguhen njëjtë sikurse perimet e tjera, por më vonë kanë dalur e kanë korrigjuar gabimin e tyre. Pemëtaria dhe perimet në serra është një sektor jo shumë i zhvilluar, por trendi i këtyre është në rritje sikurse te pemëtaria në vitin 2020 janë 94 ha, në 2021 janë 131 ha, në 2022 janë 165 ha këtu

dominimi kryesor është kumbullës, arrës dhe një pjesë më e vogël e lajthisë. Perimet në serra nuk i kemi të specifikuar edhe ky trend është në rritje për shkak të mbështetjes që është nga ministria dhe komuna, kriter i ministrisë për subvencione ka qenë që serrat mos të jenë më të vogla se 5 ari.

Spektori i blegtorisë, shpezataris dhe i bletarisë fatkeqësisht është sektori i fokusuar në rënie krahasuar 2020, 2021, 2022 e vëreni diferencën në krahun e djathtë të sllajdit , kjo është një shqetësim për neve, për anëtarët e kuvendit dhe për të gjithë qytetarët e Rahovecit. Te sektori i shpezatrisë – pulave kemi një rritje prej 15,740 në bazë të deklarimeve që i kanë bërë fermerët. Tash e kemi pjesën e mjeteve monetare që komuna e Rahovecit do t'i realizoj për vitin 2022 në bazë të pranimit të fermerëve për subvencione. Lajm i mirë që për këtë vit ne i kemi diku 5.5milion euro që fermerët do t'i marrin në kuadër të programit që ka qenë 25 milion, ne si Rahovec i marrim 5.5 prej tyre në këtë fazë. Krahasuar me vitin e kaluar diku 1.7 milion janë më shumë, këtu ka qenë fokusi sektori i drithërave që është rritë sipërfaqja por edhe përkrahja kryesisht për sektorin e grurit. Në vitin e kaluar kemi arritur të fitojmë 146.000eu, në këtë vit kjo përkrahje ka tejkaluar shumë prej 710.000eu, që i bie 385% më shumë. Sektori i rrushit poashtu ka rritje në vlerë monetare, në këtë vit është njëjtë për secilën parcelë që i bie 1000euro për hektar duhet përfshirë edhe derivatin 54euro për ha. Në fund e kemi një sllajd i paraqitur grafikisht të gjitha sektorët në vlera dhe në përqindje që janë për këtë vit. Këtu i kemi tri kolona me ngjyrë të gjelbër; subvencionimi bazë, subvencionimi për derivate, subvencionimi për pleh. Në pjesën e parë subvencionimi bazë dallon për secilën kulturë specifike, në pjesën e dytë është pjesa e derivateve ku është unike për të gjitha kulturat, pjesa e tretë plehërimi dallon nëpër kultura, që për këtë vit me pleh artificial janë të subvencionuara vetëm katër kultura; gruri, misri, fasulja, patatja...Kaq pata, pres sugjerime, kritika dhe lëvdata...

Sejfullah Sejfullahu – Dëgjova që the subvencionimi prej ministrisë së bujqësisë, që nuk i ka subvencionuar serrat nën 5 ari, apo jo? A i kemi bërë ndonjë vërejtje ministrisë së bujqësisë, ndonjë kërkesë? Po flasë si Krushian, na shumicën e serrave i kemi nën 5 ari, mendoj që duhet të rregullohet edhe në të ardhmen të subvencionohen, sepse ai që i ka 2 ari duhet t'i ndihmojmë që ta rrisë serrën dhe ta bëjë më të madhe se 5 ari.

Burim Krasniqi – Mendoj që duhet me qenë raport, e jo informatë për asamblenë komunale... Në një seancë të kaluar kur kam pyetur pse nuk është ndryshuar (nëse nuk gaboj) një rregullore e zhvillimit ekonomik me vërejtje të KPF-së, kemi thënë; materiali nuk guxon të ndryshohet, i njëjti shkon në KPF i njëjti në seancë, kjo informatë dallon shumë prej materialit që ka qenë në KPF, nuk është i njëjti, ka qenë raporti i shkurtë, disa informata shitesë janë plotësuar. Te faqja 4 aty thotë; raporti i plotë pas dokumentit të shënimeve vjen në seancën e 6-të të rregullt të asamblesë komunale, kjo nuk ka ndodhur, ka ardhur raporti-është ndryshuar prej KPF-së në seancën e rregullt. Tjetër, zotim i kryetarit në fushatën e kaluar ka qenë që 1.000.000eu në bujqësi investime, janë pajtuar qytetarët edhe e kanë përkrahur. Në fushatën e fundit e kam theksuar vazhdimisht kur jepet subvencioni në bujqësi ose diku, duhet të ketë efekt pozitiv, jo negativ. Janë dhënë subvencione, por në çoftëse bëjmë një krahasim 2020-2022, te specat kanë qenë 830.46 ha, në vitin 2022 janë 695 ha sipas, d.m.th me 100 e sa hektarë më pak spec, sipas raportit të juaj, njëjtë shkon edhe për domatet. Te shalqini prej 250 ha janë 164 ha, kjo është pa efekt, kur të them pa efekt është se kulturat bujqësore nuk ka pas rezultat të rritjes së prodhimit bujqësor dhe sipërfaqes mbjellëse, po kanë pas rezultat të zvogëlimit, kështu shkruan në raport të drejtorit. Tjetër, janë dhënë edhe pajisje për bletarë, por janë 2332 koshere bletë më pak se vitin e kaluar. Janë 397 lopë më pak se 2021, po janë shumë më pak se 2020. Kur e shikojmë, subvencionimi në manaferra, në pajisje bujqësore, në makineri, në laktofriza etj... janë komplet investime të pakontrolluara që nuk kanë sjellë rezultat të rritjes së prodhimit, përkundrazi kanë sjellë rezultat të zvogëlimit, unë nuk po e them por po e thotë raporti i drejtorit, lexojeni...

Kryetari – Faleminderit, e dëgjova me vëmendje Burimin, unë nuk dëshiroj të hy në statistika, as në këtë raport as në tjetrin, por shprehi shqetësimin tim dhe nëse shkojmë t'i paraqesim çështjet drejtë atëherë del që edhe ministria e bujqësisë në vazhdimësi ka dhënë mekanizëm bujqësorë, ka dhënë serra të mëdha, stalla, pritjet sivjet të ketë edhe grante. Por edhe komuna e Rahovecit ka dhënë mjaftë mekanizëm bujqësorë dhe do të jep përsëri. Në çoftëse nuk kishin ndodhë këto; as prej neve as prej ministrisë së bujqësisë, ekziston mundësia mos të funksionoj asgjë në bujqësi. Megjithatë në çoftëse asgjë nuk kemi bërë, të kaloj në pikëpamjen e asaj që e shprehu Burimi, kemi arritur t'a ruajmë bashkë me ministrinë e bujqësisë që njerëzit akoma merren me bujqësi dhe vazhdojnë të merren përkundër faktit që nuk e kanë të njëjtin motivacion, përkushtim, vullnet siç e kishin dikur...Ka kultura që kanë bërë rritje në prodhim, ka kultura që ka ramje por mendoj që bujqësia po shkon drejt trendit të modernizimit përmes pajisjeve të reja, nuk po them që po kthehen në bujqësi intensive sepse është proces, por mendoj që braktisja e subvencionimit të bujqve çoftë nga niveli lokal, çoftë nga niveli qendror, madje ne e kemi ngritur një shqetësim që në vitin e kaluar nuk ka pas aplikim për grante fare, sivjet po dhe pritjet të hapet thirrja pas përfundimit të aplikimit për pagesa direkte. Burim, unë i inkurajoj bujqit, pavarësisht situatës dhe krizës së madhe në të cilën gjendet bujqësia sot edhe si pasojë e zvogëlimit të fuqisë punëtore, vazhdoj të jem përkrahësi i fermerit çoftë me mekanizëm, çoftë me subvencionim në kultura, në ferma, në stalla, në bletë e çfarëdo komponenti që është pjesë e një projekti për bujqësi intensive. A kanë shkuar investimet dëm? Nuk mendoj ashtu, nuk mendoj që kanë shkuar dëm sepse kërkesat e bujqve kanë qenë ashtu, vazhdojnë të jenë kërkesat për serra. Të kemi mundësi ne nuk iu japim Benas, por traktorë të mëdhenj, plugje të mëdhenj etj... ju kisha lutur mos më ndërprisni dhe mos reagoni prej vendit... e kam verifikuar përmes komisioneve 7 komisioneve që i kam formuar që nga 814 pajisje që janë dhënë në vitin 2020, një i Hoçës së Vogël është që ka dashur ta shes pajisjen, por edhe atij iu ka pamundësuar një gjë e tillë, mos flisni kot se jeni në kuvend të komunës, nëse keni fakte shkoni në prokurori, bjeri në drejtori të bujqësisë, urdhëro...Ne e kemi një kontratë me ata, 3-5 vjet është në pjesë të komunës, në çoftëse ai e ka shitur, të siguroj që unë personalisht do e thërras prokurorin. Ne do ta shqyrtojmë mundësinë a ka nevojë më për kësi lloji të mekanizmit bujqësorë apo jo, apo është një nevojë tjetër që do t'i ndihmonte bujkut tonë, po flasë si komunë, ndërsa politikat e ministrisë së bujqësisë i cakton qeveria. Por si komunë vet e kam parë që është e panevojshme më të shpërndajmë benas, është e panevojshme me dhënë po supozojmë diçka që kanë marrë shumë, por ndoshta është shumë e nevojshme që mos të japim serra 3 ari, po ato prej 10 ari, mos të japim më plugje, por të japim pleh kimik ose impute bujqësore, por nuk kemi pas mundësi sepse ato kanë qenë direkt subvencione. E kemi ndërmend t'a trajtojmë bujqësinë si prioritet sepse është fushë veprimtari i veçantë që e karakterizon komunën tonë në raport me komunat tjera por edhe në shkallë republike. Jam dakord me Burimin kur thotë, ndoshta nuk i ka shërbyer, por së paku ia kemi dhënë një mundësi që mund të punojnë me një benas, me një serrë etj... Isha te Feim Rexhepi, e pashë që janë të kënaqur me produktet e serrës, trangujt për shitje. Nevoja për serra është më e madhe, ne jemi të interesuar t'i rishikojmë politikat se në çfarë mase t'i shërbejmë më shumë. Jam dakord që bujqësia ka rënë në shkallë republike, në këtë rast sipërfaqja e specave është zvogëluar, por e vreshtave është rritur, sektori i përpunimit të perimeve po merr një hov tjetër, vetëm në Krushë të Madhe ndoshta janë 7-8 qendra për përpunimin e produkteve (perimeve), në këtë rast në çoftëse duhet t'i japim mbështetje sektorit të përpunimit apo mbulimit të sipërfaqeve në serra, apo imputeve shoqërore, farërave, plehrave etj.. në këto pikëpamje ne jemi të interesuara t'i rishikojmë politikat të mbështetjes së bujqve të komunës së Rahovecit dhe kjo është shumë normale.

Ndoshta pas 5 viteve kjo ndihmë nuk do t'iu duket asgjë bujqve, po sidoqoftë ne duhet t'a shikojmë trendin e kërkesave që së paku t'a kenë shumë më të lehtë punën që e bëjnë në bujqësi. Në bazë të raportit Burim, në ato statistika që ti i përmende, ka ramje në disa sektorë, po në disa tjerë ka rritje, nga kjo pikëpamje nëse 1000 vet i kanë kërkuar nga një benas për secilin, ti nuk mund të dalësh kundër kësaj, ndoshta tash më nuk iu duhet ky produkt, 5 vite kanë kaluar, pas 5 viteve konsiderohet kapital i transferuar dhe më autoritet nuk ka komuna me kontratë. Por tani duhet të subvencionojmë diçka tjetër, prandaj unë jam i kënaqur sepse ne i kemi rritur subvencionet, sepse mekanizmat bujqësor, serrat, stallat, fermat etj.. kanë qenë investime kapitale, tash nuk na lejohet të jenë kapitale dhe se rritja e subvencioneve na jep mundësinë që ne të hyjmë në inpute bujqësore, farëra, plehra kimik etj... për nevojat e bujqve që besoj që me kohë do të kenë nevojë për këto sepse synojmë t'a fuqizojmë këtë komponent si komunë...

Burim Krasniqi – Kryetar, pa dashtë të bëjë ndonjë replikë të madhe, asnjëri prej neve që kemi qenë në fushatë zgjedhore nuk kemi thënë që bujqësia nuk është prioritet, secili e kemi thënë në formën e vet, ju ndryshe, une ndryshe, Bejtullahi ndryshe, Visari e Xhafa ndryshe, po e kemi pas prioritet. Nuk mundesh me thënë që unë e kam prioritet dhe do t'a kem gjithmonë sepse të njejtin synim e kemi edhe ne. Prej përvojave që i kemi bashkë, keni thënë që “kur s'dinë njeri edhe me vet nuk është keq”.

Për që keni provuar që t'i rrini fjalës pas që keni thënë 1 milion euro në bujqësi dhe të jipni mjete bujqësore, e keni gjetë formën më të lehtë për shkak të në pamundësi të subvencioneve, puna është tjetër, po ja që nuk e keni rritur efektin e mjaftueshëm, është fakt.. E treta, ka vepruar ministria e bujqësisë kështu dhe ata nuk kanë mbërri, në çoftëse dikush e ka bërë një shembull jo të mire, nuk do të thotë që tjetri ta bëjë të njejtë gjë, uroj që prej gabimeve ndonjëherë të mësojmë t'a bëjmë metodën tjetër, të rrisim efektin direkt dhe jo të mburremi që e kemi ndalë trendin e ramjes, po të provojmë të kemi trend të rritjes.

Kryetari – Burim, unë asnjëherë nuk jam penduar që ne i kemi mbështetë fermerët, pavarësisht çfarë raporti lexojmë. Ka qenë një kohë kur kërkesat për mekanizëm bujqësor kanë qenë në përputhje me politikat e komunës, tash kërkesa për inpute bujqësore mund të jetë një kapitull i ri. Qëllimi i jonë është që bujqësisë t'i japim prioritet, a jeni në dijeni që rinia është duke ikur e gjitha, në asnjë sektorë nuk dëshirojnë të punojnë, prandaj pavarësisht këtyre zhvillimeve që ka edhe gabime si në nivelin lokal ashtu edhe në qendror, megjithatë ne kemi arritur t'a ruajmë identitetin si një trevë bujqësore, e tani e tutje kërkesat e reja ne duhet t'i adresojmë dhe asnjëherë nuk them që qëllimi ka qenë të jetë 1 milion, sepse është kaluar një milionëshi, sepse bujqësia nënkupton edhe rrugët fushore dhe mirëmbajtja e tyre, kanalet e kullimit, drenazhimi i tokave fushore, bujqësi është edhe kjo këtu që deri tani janë cilësuar si investime kapitale e tash janë subvencione, mekanizmi bujqësor, serrat, mbështetja e bletarëve etj etj... Në vazhdim mund t'a fuqizojmë sektorin e përpunimit të pemëve dhe perimeve, pastaj inputet, kemi arritur t'i mbështesim shumë pak sepse buxheti na është hargjuar në serra, rrugë fushore dhe mekanizëm bujqësor. Pastaj, inputet janë shtrënjtur shumë, po i shihni edhe vet, 1 L karburant 1.85, një vendim i qeverisë dje – deri tani Petrol Company ka pas të drejtë deri 1.70 të ketë litrën, tani ka të drejtë deri në 1.85 sepse është biznes privat. Të isha pyet unë nga ministri i financave dhe kryeministri maksimumi do të ishte 1.40, t'a zvogëlojmë arkën e shtetit, most ë marrim shumë prej akcizës, të përfitojnë qytetarët, bizneset sepse nafta është rritje 100%. Nuk mund ta paramendohet se sa situatë e vështirë është e jetës dhe e punës edhe ndihmën që iu kemi bërë bujqësisë ndoshta nuk është e mjaftueshme, sepse nuk kemi mundur t'i ndihmojmë në përpunim, në

lehtësira për treg, në subvencionim të qumështit etj.. e me rritje të subvencionit do të kemi mundësi tjera...

Lirigzon Kastrati – Faleminderit kryesues, kryetar, kolegë asamblistë. Kryetar, këto statistika nuk janë prej atyre që n'a kënaq neve si grup i asamblistëve, është shqetësuese... Komuna e Rahovecit është vend bujqësor, nuk po të themi ndalu, përkundrazi të inkurajojmë të vazhdosim me përkrahje e subvencionim, përndryshe vetëm pak vullnet që në terren të shikohen punët ndryshe. Bujqit ankohen për sëmundjet e grurit që në disa pjesë janë. Drejtoria e bujqësisë po edhe kuvendi duhet të jenë të gatshëm të dalim në terren dhe t'i shikojmë pse janë këto sëmundje si për specia ashtu edhe për grurë.

Kryetari – Ne kemi bërë përpjekje edhe me fakultetin e bujqësisë për shqyrtimin e sëmundjes së specit, vreshtave, po tani as ti as unë s'jemi inxhinierë të bujqësisë, komuna e Rahovecit me kapacitetet që ka jo vetëm buxhetore, por me ekspertizën që ka nuk mund të pritët të eliminohet fitoplazma apo edhe kjo tjetra, nuk është që mundet vetëm, por trajtimi i këtyre sëmundjeve duhet të bëhet nga një nivel tjetër dhe na jemi nikoqirë të mire dhe jemi në gjendje t'i mirëpresim, ju ftoj të gjithë ekspertët që i LDK- dhe jo vetëm LDK dhe po supozojmë t'i trajtojmë këto sëmundje në nivel dhe motivacion tjetër. Sa i përket përkrahjes, nuk do të ndalet përkrahja. Ne tani kemi probleme edhe me furnizimin me mekanizëm bujqësor për shkak të transportit sepse të vije një transport prej Kinës ose përtej oqeanit është trefishim i çmimeve të transportit, nëse ka kushtuar një kontejnerë 4000dollar tash kushton 12 ose 13.000 dollar. Njësoj e ka këtë problem Shkëmbim Haxhijaha, djali i Halimit, kanë probleme me transport, ata bëjnë diçka por jo si 2019-2021, kjo ndodh për shkak të politikave shtetërore të cilat nuk po arrijnë të subvencionojnë humbjet potenciale nga kjo gjendje, ose së paku nuk kemi ende përgjigje t'i japim zgjidhje çoftë edhe të përkohshme këtyre situatave të vështira që po kalojmë, nuk kemi përgjigje as për rishikimin e kontratave që janë lidhur para rritjes së çmimeve, nuk dua t'ia lë fajin askujt, por thjesht nuk kemi përgjigje. Pa subvencionim dhe pa i dhënë asgjë bletarit ka gjasë të zvogëlohet pozita e tij, nga kjo pikëpamje mendoj që bujqësia do të jetë temë e qytetarit, drejtorisë së bujqësisë dhe e kuvendit...

Lirigzon Kastrati – Jo vetëm e kuvendit, kjo temë është shqetësuese për tërë qeverinë e republikës së Kosovës.

Kryesuesi - Faleminderit Lirigzon, dikush tjetër?...Nëse jo atëherë po vazhdojmë te pika e 17 e rendit të ditës;

17.Shqyrtimi dhe miratimi i propozim-vendimit për shfuqizimin e vendimit nr.332/22 i datës 31.05.2022 për caktimin e lokacionit për hapësira për biznese;

Erhan Morina – Para jush e keni materialin për shfuqizimin e vendimit me nr.332/22 të datës 31.05.2022, krijimi i hapësirave për biznese në zonën kadastrale në Krushë të Madhe, bëhet fjalë për dy parcela me certifikatë të pronësisë 02704-0 02745-0. Kjo pikë është kthyer nga MAPL-ja dhe ne sot në këtë seancë kërkojmë shfuqizimin e këtij vendimi.

Kryesuesi – Faleminderit drejtor, dikush diçka rreth kësaj pike të rendit të ditës?...Nëse jo, atëherë po e vendosim në votim, kush është "për" shfuqizimin e këtij vendimi? ... Me shumicë unanime vendimi me nr.332/22, kështu po përmbyllet edhe pika e 17-të e rendit të ditës. Vazhdojmë me pikën e 18-të;

18.Kërkesa për ndryshimin e akronimit ka shkolla e mesme e lartë (Shml) profesionale në institutin e arsimit dhe aftësimin (Iaap) profesional Selajdin Mullabazi- Mici;

Avni Morina – Përsëritet të nderuar të pranishëm pra ky është në vendim që është dashur të vie në kuvend, bazuar në udhëzimin administrativ të ministrisë së arsimit 102/2022 për emërtim dhe riemërtim të institucioneve publike edukatore arsimore dhe aftësuese, është vendim i MASHT-it me

nr.2-3726 i datës 28.08.2019, me anë të kësaj kërkesë kërkohet që në bazë të vendimit të ministrisë të ndryshohet akronimi, jo emri i shkollës, po akronimi nga ai i tanishëm që është SHML “Selajdin Mullabazi-Mici” në IAAP, është obligimi ynë ligjor sepse përmes këtij vendimi që është rekomandim i inspektoratit të arsimit t’a krijojmë mundësinë që mos të kemi probleme në hapjen e drejtimeve arsimore, siç kemi pasur vitin e kaluar.

Kryesuesi – Faleminderit drejtor, a ka dikush diçka prej anëtarëve lidhur me këtë pikë?...Nëse jo, atëherë po e vendosim në votim, kush është për?...Me shumicë unanime aprovohet edhe pika e 18-të e rendit të ditës për ndryshim të akronimit. Vazhdojmë me pikën e 19-të të rendit të ditës;

19.Shfuqizimi i vendimit nr. 329-22 për ndryshimin e vendimit 296-22 për caktimin e lokacionit për ndërtimin e morgut për nevojat e komunitetit të fshatit Hoçë e Vogël;

Afrim Oruqi – Faleminderit kryesues, të nderuar kuvendarë kërkojmë falje për shkak të pamundësive të përgatisim materialin për secilin kuvendarë, jemi munduar t’a përgatisim një skicë të terrenit me koordinata për sipërfaqen prej 5 ari në zonë kadastrale në Hoçë të Vogël. Ne, këtë vendim që tani po e shfuqizojmë e kemi marr muajin e kaluar, mirëpo MAPL ka konstatuar se parcela e cila është pronë e komunës së Rahovecit është mbi 3 ha dhe PZHK këtë parcelë po e ndan gati përgjysmë ku 60% e parcelës është tokë bujqësore dhe 40% është tokë ndërtimore dhe ata në ligjshmërinë e vet kanë thënë që është e kundërligjshme, duhet të rishikohet për arsye që boniteti i tokës bujqësore nuk mund të ndryshohet në këtë vendim. Ne sot bashkë me gjeodet kemi dalë në terren, e kemi incizuar objektin ku po ideohet të ndërtohet morgu i fshatit në Hoçë të Vogël. Në këtë skicë iu kam prezantuar edhe shefave të grupeve parlamentare me koordinata të kësaj sipërfaqe prej 5 ari dhe ne nuk dëshirojmë që as në këtë vendim që do t’a marrim sot, t’a ndërrojmë bonitetin e tokës por dëshirojmë të marrim vendim që këtë lokacion ta caktojmë me sipërfaqe vetëm prej 5 ari të sipërfaqes së përgjithshme të kësaj toke mbi 3 ha dhe fatmirësisht kjo pjesë është në zonë ndërtimore. Kërkoj nga ju që fillimisht t’a shfuqizojmë vendimin e muajit maj dhe të nxjerrim një vendim të ri, për caktimin e lokacionit prej 5 ari prej sipërfaqes së përgjithshme në tokë të komunës së Rahovecit në zonë kadastrale Hoçë e Vogël.

Merisa Sharku – Këtu kush është në faj që e kemi votuar? Në këtë rast edhe unë ndjej përgjegjësinë edhe fajin që i ecim përpara pikat e pastaj prapë po kthehemi në këtë pikë. E keni ditë që 60% është tokë bujqësore, pse atëherë e keni marr vendimin me shty përpara këtë çështje, që të kthehet prapë e të shtohet një pikë e rendit të ditës në seancën e sotme? Apo çka?...

Afrim Oruqi – Ne e kemi ditë edhe e dimë sot që pjesa prej 60% të kësaj sipërfaqe të përgjithshme është tokë bujqësore sipas PZHK-së e pjesa tjetër 40% është tokë ndërtimore. Ne kur ju kemi dhënë materialin kemi kërkuar nga ju pëlqim për caktimin e lokacionit për ndërtimin e morgut në sipërfaqe prej 40% po MAPL nuk e ka pas të qartë, ne prapë kërkojmë nga ju sot të vendosim për caktimin e lokacionit në këtë 40% se kuvendi i komunës nuk është kompetent t’a ndryshoj e as PZHK në këtë rast, as me rrit prej sipërfaqen në përqindje, ajo vazhdon të jetë 60% tokë bujqësore ndërsa pjesa tjetër prej 40% bashkë me juve po vendosim prapë një pjesë të parcelës prej 5 ari të ndërtojmë një morg për fshatin Hoçë e Vogël e rrethinë.

Lirigzon Kastrati – D.m.th fillimisht po n’a kërkohet t’a shfuqizojmë, pastaj t’a votojmë? ...

Ilir Pallqa – Drejtor, edhe një herë po e përsërisë, a ka mundësi që herrave tjera ta shikojmë edhe ne vendimin e MAPL-së, arsyetimin e tyre, sepse nuk e kemi të qartë!...

Afrim Oruqi – Kërkesë e drejtë, e ka kërkuar edhe kuvendari Burim Krasniqi, kërkojmë falje singërisht, sot materialin duhet t’a keni përpara, çka do që vendosim sot brenda 15 ditëve deri më 15

korrik n'a vjen ligjshmëria e kuvendit, tutje ne do të kujdesemi që në seanca tjera të radhës t'iu siguroj çdo konfirmim të ligjshmërisë që vjen prej MAPL-së ...

Ilir Pallqa - Një propozim për ekzekutivin në tërësi; vendimet e kthyer nga MAPL-ja të bashkëngjiten, se këtu nuk mundemi t'i besojmë fjalëve, ne kemi punë me dokumente...

Kryesuesi – Faleminderit Ilir, besoj që është kërkesë korrekte që edhe më herët ka qenë edhe nga Burimi, që vendimet që kthen për shqyrtim nga MAPL prej seancës tjetër sekretaria e kuvendit nëpërmes kryesuesit ia shpërndan asamblistëve...Vendimet vijnë në emër të ekzekutivit dhe në emër të kryesuesit të kuvendit. Dikush diçka tjetër lidhur me këtë pikë të rendit të ditës?...Nëse jo, atëherë meqenëse drejtori i propozoi të dyja pikat, një pikë shfuqizimi i vendimit, pika tjetër është vendimi i ri për caktimin e lokacionit. Një herë votojmë për shfuqizimin e vendimit, kush është për?...Me shumicë unanime, shfuqizohet vendimi 329-22, tash po e vendosim në votim vendimin e ri për caktimin e lokacionit për ndërtimin e morgut për nevojat e komunitetit të fshatit Hoçë e Vogël, kush është për?...Me shumicë unanime miratohet edhe pika e 20-të e rendit të ditës. Kështu po përmbyllet edhe rendit i ditës për sot bashkë me seancën e sotshme, ju ftoj që nesër në me rastin e ceremonisë mortore të organizuar nga komuna e Rahovecit, të merrni pjesë në mbledhjen komemorative në shtëpinë e kulturës prej orës 15:00 ...

Mbledhja përfundoj në 16:30

Procesmbajtësi:

Agim Hoti

